

吉安府志卷五十一

藝文志

詩徵


七言古詩
五七言律詩

七言古詩

蕭孟昉初營滕寓予適來客賦二百四十二字

國朝
魏 禕

研鄰先生天下豪千金萬金比鴻毛
眼底每嫌五湖窄胸中時有五嶽高
能於城市生坵壑一泉一石隨意作
到處敗場與童山青林一夕蔭高閣
春浮遯圃不稱心研鄰窈窕殊晴陰
兵火歸來頗荒落隔江暫住旃檀林
圖書滿架竹滿寺叉手閒行聊適意
望江欲起白玉樓從僧更乞金



沙地杆聲不絕馬亂嘶清風天外來故知一別八年還相
 見君尚黑鬚我白髭謂我曲闌種芍藥修廊斜帶池心閣
 欲識前山高未高自上梅梢俯寥廓大江潏蕩小溪清晴
 林隱隱見層城更結幽房二三個春蘭秋菊間茅亭萬馬
 渡江日不止晝閒且自攤書史古之達人良有言何用為
 樂心所喜

玉帶生歌 并序

朱彝尊

玉帶生文信國所遺硯也余見之吳下既摹其銘而裝池之且為之歌曰

玉帶生吾語汝汝產自端州汝來自橫浦幸免事降表簽
 名謝道清亦不識大都承旨趙孟頫能令信公喜辟汝置
 幕府當年文墨賓代汝一一數參軍誰謝皋羽寮佐誰鄧

中甫弟子誰王炎午獨汝形軀短小風貌樸古步不能趨
 口不能語既無鸚之鵠之活眼睛兼少犀紋彪紋好眉嫵
 賴有忠信存波濤孰敢侮是時丞相氣尚豪可憐一舟之
 外無尺土共汝草檄飛書意良苦四十四字銘厥背愛汝
 心堅剛不吐自從轉戰屢喪師天之所壞不可支驚心柴
 市日慷慨且誦臨終詩疾風蓬勃揚沙時傳有十義士表
 以石塔藏公尸生也亡命何所之或云西臺上晞髮一叟
 涕漣漣手擊竹如意生時亦相隨冬青成陰陵骨朽百年
 蹤跡人莫知會稽張思廉逢生賦長句抱遺老人閣筆看
 七客寮中敢嗔怒吾今遇汝滄浪亭漆匣初開紫衣露海
 桑陵谷又經三百秋以手摩挲尚如故洗汝池上之寒泉

漂汝林端之霏霧俾汝留傳天地間忠魂墨氣常凝聚

青原山新瀑布歌呈藥地大師 徐緘

大師昔臥匡廬雲匡廬瀑布長隨君驚看浮杯渡絕壁揚
枝迸灑天紛紛我謁祖關不辭遠更覓懸流歷千轉雌霓
連蜷望去除毒龍行雨歸來晚飛鳥背上驅五丁嵌空鑿
穴穿枯藤陽坡倒懸海底日陰崖未解春前冰由來奇寶
塵中沒少陵晚愛金篦刮不知七祖鉢誰傳但見黃荆種
猶活藥公採藥無古今百川到海難為深坐上詞人盡回
向山中虎狼皆善心前身金粟施湖西邀我同登萬仞梯
白衣解餉淵明酒山公不醉習家池桃花忽送漁郎出回
首潺湲空翠微

自壽昌寄上青原笑和尚 無可智

竹關別後一懶終天乃以師指重烹教乘因外祖
吳太史書徵三世易寂歷同時別傳遞二而又遮
一權奇煉將耳鼎薪
易圖祝壽知惟一笑

七十老翁甘此苦石頭山好一張斧砍開大地荆棘林燒
畚晚穫當爐煮煮爛廬陵米作湯破人喉痺刮人腸飯羅
裏餓海裏渴必勞吐泄施奇方御喜青原南嶽一口氣烹
三炮五吞一味我峯塢頂突雙尖垂足流胸好兄弟窮子
血盡合山廬浮來菜葉鋪茅居竹關咬指感吹韝仰天讀
破元黃書請看龍无首龜開口伸出一行元會手屈指十
二萬九千六百年且吸博山烟上壽

浮山吟送藥公入青原 施閏章

時將為笑
公封塢

吉安府志 卷五十一 藝文志

浮山一片雲飛落蒼梧野忽值南風吹旋歸廬嶽下往還
 離合詎無因十年舊事休重陳三生石上魂未斷長瓢來
 濯清江濱老禪不演三乘義却注南華窮豕繫推到輔嗣
 冢中骨笑看蒙叟人間世泐泐清辯渾無語食盡茶蓼崖
 蜜苦戲拈稗米是神仙捲起河源作飛雨坐中秋色何蒼
 蒼城頭絕巘森相望興來遣興揮秃筆淋漓墨跡紛滿牀
 瑤掃青原入山窟地作蒲團隨處歇黃荆倒插鬱菁葱又
 見孫枝爭秀發敬亭愚叟空谷嗟鐵牛尚曳泥中車憑君
 吸盡西江水灑種青蓮滿地花

余與藥公相見於蒼梧雲蓋寺後相挈度嶺至廬山

乃別故有起句

泰酒歌 有火酒老酒二種

西昌半月罷飲酒舉杯勸我但搖手眾醉那能甘獨醒昔
 稱歡伯今良友可憐火酒如寒泉一觴未進喉欲然身非
 卽墨與燕敵火牛何用摧中堅再傾琥珀名老春沃我消
 渴瑩心神醕醪苦雜青梅味裂牙蜚鼻還愁人太常故老
 有伯玉自稱家釀比醪醖 蕭太常士璋家釀名酒見春浮園日記 安得就君
 乞一斛斯人不見傷局促客夜憂來不可當眼前况復荷
 花香祇應記叟壚頭醉回首家園天一方

九洪孝持入青原觀瀑歌以送之 汪楫

爾去青原尋瀑布敢爲僕夫告其處釣臺之下清溪深君
 行徑過此溪去奔湍時響空谷風叢篁欲沒飛鳥路數折
 以後天逾小怪石老松互割據我昔游此天氣佳猶及飽

看荷花樹葉如冬青幹如棟隱隱綠波藏白鷺豈無樵牧
 待攀折半壑雲封不得度漱青峽底乍聞雷紫茗田上新
 栽黃猿掛蛇行學不能峯迴條與飛泉遇濺珠激雪真爾
 為海風江月何堪註一半懸空半注壁龍首龍身肯全露
 老柏蒼藤位置偏競出蚪枝作煙霧左有一巖更奇兀嵌
 空石碣憑呵護碣上題名小三疊藥地老人手親署衝泥
 虎跡何時乾白日照天渾欲暮小憇須過青又菴紀遊莫
 怖愚山句記取經過十九溪為我一溪留一賦

己卯三月十日重遊青原

孔興浙

初入谿山山勢阻谿訝背向凌丹宇玲瓏石筍翠柏森秋
 屏還讓春山古山裏深春鳴鳥幽僧堂茗飲日卓午魯公

志在山水間二愚曾作青原主施愚山方愚者三疊流泉五笑亭
 名與東林堪亞旅

摩挲金石真奇癖醉看龍文寒血碧李忠定綱飯僧青原有詩康熙辛酉太平

楊守竹菴鐫石四十一版山靈有幸洗容顏飛出鳴泉響

灑灑感慨生涯幻古今逢場一任梟盧擲相關聖域亦荒

涼獨有青山自剪劣山花山艸慣經年更覺春雲添潤色

尋三相故址

李紱

芸生九土紛黎蒸惟有豪傑流聲稱往往卿相起屨簪沒
 沒誰知粥飯僧台鼎綸扉不易登禾山三相良足矜姚公
 事業古凝丞才大難偶人頗憎臨事敏決無葛藤開元盛
 治實倚憑奇章文采道未宏中間波激何峻嶒太平無象

孰與徵百年朋黨傲相承那信前身忽代興楚公殊不相
因仍舊堂蕪滅漫坡塍空山俯仰思惜騰古來才者互憑
陵當時姚張不相能牛李交譏誰鷓鴣文安北使蒙青蠅
雲蒸龍變偶一乘四海要當攬轡澄不見奇節如滂膺安
問人間炭與冰

釣魚臺謁李忠肅公墓

崇禎欲末政頗側日月無光天地黑九關不守帝座傾鬼
哭煤山石崩泐忠臣一死殉君王荒墓空餘苔蘚蝕當時
闍禍殘縉紳鈞黨蔓延遍南北懷宗旣立始擴清志欲補
天扶社稷惜哉心鑿智不明賢奸雜用列羣職內閣紛紛
五十人獨任僉邪温相國民饑當卹歛當薄用一緩二古

有則暫累吾民賦一年斯言胎亂終何極惟公大節冠清
流名在東林位槐棘危言讜論棄不用浩然正氣填胸臆
文山瑞宋公懋明厄運重逢垂左翼釣魚臺畔暮雲黃舊
事淒涼重太息惟有興朝淑慝分 綸綍光增幽壤色

讀歐陽文忠公集用公紫石屏韻

天地精華日流轉始盛於北終趨南周公雅化布漢廣屈
平騷頌鳴江潭如星五緯自炯炯如山五嶽常巖巖西江
風雅有宗派淵源直溯柴桑潛於詩旣昌文未暢十得五
六遺四三平生寶愛六一集扁鑰什襲重錦緘臺閣之體
薦郊廟名山之業藏雲巖鴻篇短製一展讀以古爲鑑光
出奩當時手定五十卷刊落灌莽留松杉李詩韓筆兩絕

響惟公奇特才能兼朝吟夕諷口流沫不知赤日迴晴簷
 起衰豈屬異人任賞奇要共同心譚吾鄉風氣喜日上一
 時豪俊相研探庶幾中興及先服直追大雅排浮纖萬君
 文筆最峭拔法如荆國何森嚴梁生魁壘擬子固兩馮駿
 逸追由瞻惟余澀僻學原父偃蹇不入公鑪鉗漫憑吹萬
 發天籟不知元氣能包含只今文柄久旁落楚圍先晉戎
 伐凡公文一讀每三歎何人後死寧無慚敦槃共約續前
 烈方心可鑿肝可劉京華長書有餘暇罔俾專美徒鳴謙

廬陵行次王瀘溪先生韻

贛江疾走春波洪經過名郡雄江東青原白鷺地佳絕觚
 稜突兀經樓紅當年奮起六一叟炯如日月行天中起衰

五代繼韓子如撞金鑪振黃鐘包劉越羸信奇傑公乃渾
 噩追黃農五音各具天地氣春容元氣尤推宮上調中和
 建皇極始終八音行八風人往風微談軼事豪傑終當繼
 公起後之視今今視昔萬世不窮一尺捶公生吉州吾撫
 州過公故里還遲留 國家重熙盛文運知有何人出一
 頭

天馬歌 秦和山名

章純德

杪秋節物當重陽丹楓點綴千崖蒼嘉遊侵晨出古寺選
 勝遙登天馬岡晴峯迴復何疊疊神駒蹀躞殊昂昂想當
 鴻濛始闢不受鞭與韉天駟脫鼻下大荒白石為骨松為
 鬣騰驤磊落千尺強夜飲銀河穿溟滓朝嘶碧落窺扶桑

權奇本是鳳豹質，蹴蹋不競青雲長。當年一吼聲琅琅，飛騎哲人來帝鄉。前有省軒後文莊，使我懷古增悽愴。終年寂寞遊人少，翦剔何曾煩九方。天馬天馬兮，我欲騎之朝天闕。驚如電閃驂龍翔，我欲乘之舞樂野。身跨狐背調清商，安得一滴鬃鬃作雨澤，徧灑九州四海恩汪洋。

題吾汶稿

王炎午集名

金德瑛

丞相不勸原必死，先書祭文數十紙。得得燕山齒髮歸，同心不愧同鄉里。昔者宋玉師屈原，莫能直諫空招魂。未知楚滅身何所，千古但有風流存。何如廬陵王鼎翁，耻作機雲作陳東。心哀母老難許國，不然隨殉柴市中。虔州之水洪州驛，處處悲風寒凜凜。義士相望四百年，歙州亦有江

天一

望禾山

李錫

禾山距我百餘里，我自東來忽仰止。拔地千尋一氣盤，巖然五老隨扶起。重巒疊岫爭相趨，繞膝環看孫若子。松逕澗洄羨鳥飛，懸巖點綴雲青紫。精舍天開隔世塵，梵唄風吹聞遠邇。面面削出金芙蓉，爽氣循環浮眼底。龍門妙墨擘空飛，灑落喧聞百尺水。自怪牢騷莫息肩，崔嵬未易得逢此。何時策杖登高壇，七十一峯細屈指。

周別駕拯水災詩

蔣士銓

河決考城再決儀，封南下勢如虎歸。德當其衝郡守出，別駕留戍戍之閏。廿九日別駕馳野心，口謀護城堤接沈公

堤調集夫役併力修七月朔漏三下河伯將至丞尉怕護
隄七門以次塞萬命如絲依別駕越五日河伯來鼃鼃觸
堤門不開蟻房穉穴涓涓篩別駕出錢拯民餓三夕昏堤
堅可賀堤外鳧鷖男女浮別駕登城淚交墮四筏八舟分
救之何止全生千萬箇入城人眾市閉苦饑發粟平糶別
駕哺之別駕貧且瘠一心兩手作保障參身洪流仔艱險
氣力兼併千夫強別駕名堦身姓周一生名宦傳中州天
生孝子作循吏縱筆自喜文詞道老併心力教歌舞得不
償媚嫵未害廣平心似鐵笑聽秋娘唱金縷周別駕吉安
人字伯譜

文信國琴

四尺枯桐七條玉中有包胥萬聲哭琴曲誰聞集杜詩紀
事悲吟指南錄破家結客起義兵夜遁京口逃空坑隨身
襆被且無有航海莫共成連行青原操縵心骨摧一彈再
鼓天地哀謝翺杜澣不復侍響隨竹石崩西臺太古遺音
存正氣壞漆長留丞相守君不見漸離之筑司農笏千載
流傳同寶器吁嗟乎斷紋斑剝空撫摩不共齒髮埋山阿
松風夜戰海濤立柴市魂歸尚嗚咽

虎潭訪宋蘇文忠公遊蹟卽步其韻 周堦

蘇公自昔移汝州道出虔吉恣豪遊有友山谷兄大臨作
宰龍泉別曩疇迂道相訪相歎密載酒載客來水頭虎潭
潭上遊虎山蹲石肖虎烟濤間無奈將軍至飲羽有蘇學

士來開顏一尊坐倚樓百尺評點水天渾一色酒酣黃宰
 供湘毫髯公振髯浩歌發好景瀉作墨瀆流一詠一觴大
 白浮醉即狂耳吏人走伯儼老僧猶狎鷗此意不入風波
 路祇今宛矣伊人沂虎潭之虎一石頑今比空羣伯樂顧
 衙官屈宋與曹劉後之來者誰能伴綺園芳嶼所在多不
 逢勝賞夫如何坐惜平泉一片石當時空寶如鳴珂有壁
 勿懷懷者罪芻蕘雉兔羣從過定有名流圭璧垂請君更
 聽雙鬢曲

讀郭雲機先生列傳

有引

曾衍蕃

故冢宰郭公雲機蕃外高祖也前明鼎革殉節虔
 城往時周韻亭同年嘗言閱舊志載郭公事蹟如
 丈夫未表鬚眉相與欷歔者久之去春邑侯杜西
 田先生重修邑乘適韻亭子丙艱在籍共董斯役

是年冬蕃自鶴山解組歸西田先生以新志稿見
 示盡易故步始覺有涓陽警歎之意夫韻亭言之
 不意其遂能自西田行之使熊熊寶氣歷久彌光
 然則人貴自立固不患塵埃中無物色也感而賦
 此

誰家畫龍不點睛破壁飛去龍乃靈誰家畫馬不畫骨取
 精受潔生氣勃先生汾陽之苗裔天為板蕩特見奇鬼神
 呵護精爽在淚血涓陽怨如箕豐城劍氣秋水藏雷煥一
 面發光芒曲誤恰得周郎顧如贈路車與乘黃人生浮世
 流水去愛人善祝不善詛豈知丹青一垂時終以夙夜永
 其譽諦觀下筆生面開不必獨羨良史才但知我公留正
 氣畢竟拂拭入蘭臺不好真龍好畫龍祇得形似阿堵中
 傳神阿堵推妙手風雲雷雨吾何有

禾峯突兀七十一勢與朱陵爭後先層巒絕壁人不到上
 有平湖欲倚天龍溪雪浪怒如雷平原鐵筆留石邊崑口
 遺踪依然在五老拱峙自何年三相讀書臺猶舊雙童執
 卷心能堅中有古峙名甘露十八傳燈稱聖賢拂塵楊枝
 長不老打鼓蒼松竟窅然石壁燈懸明千古照耀大空吐
 青蓮修竹古坪臨無地橫嶺枕障鎖雲眠金牛嘯弄山間
 月飽餐煙霞不被牽白雲峯頭鳥跡稀翠崖凌霄來天仙
 萬歲古橋濟川功鴈塔鳳儀開世緣

泰和雞爲旭莊主人賦

姚頤

名雞來自家江南虎鼻峰北巖穹岷傳說仙人煉鉛汞丹

泉流出山下潭邨雞臚膊戲潭側金膏玉液出且含仙成
 種類甲天下此語或合齊東參我聞異產出細尾金鉸反
 翅胡鬚鬚錦膺或向南詔索駝毛競從竹步探地志方物
 古所艷有如銀杏兼金柑茲物土人頗珍惜補中妙用本
 草譜每和茯苓藉調劑不肯抱俎供肥甘雪毛如柳絲麩
 麩骨烏耳綠朱冠參爪攢鐵戟數盈五聲應銅漏度必三
 特立自作羣中鶴凡禽那數籬邊鷓往時有客募名種雕
 籠飼養如桑蠶水土未服橘化枳大江揚子愁風嵐霜雪
 萬里長安道何異注水來驂驪自非神明遠呵護毋乃元
 氣中包涵主人讀易耽清談窓頭朝夕鳴鶻鶻祝公樂事
 知所耽養成十日羣雞慙君不見禰衡鸚鵡徒咕譎韓公

鳴雁終願領豈如微物獨得所素心原非稻梁貪

題元蘇宏道書延祐甲寅江西鄉試石鼓賦卷

并序

元延祐元年江西鄉試石鼓賦李丙奎徐汝士王與王陳祖義李路羅會吳舜凱蘇宏道凡八篇書者宏道也宏道承豐人按江西志是科凡四十八人而無李丙奎陳祖義李路其他郡縣志所載尚有許天虎饒拊李政李于安劉愷悌程祥周沂七人統計則五十八也考元史皇慶二年定制天下選合格三百人蒙古色目漢南人各七十五江西南人止二十二不應若見之多又省郡縣志皆有二羅曾一南昌一廬陵廬陵者登乙卯進士南昌者官吉安路同知則未知此所書賦為南昌歟廬陵歟要之是八人者其賦具在皆可觀也鄉里後進能無望古之思乎是卷三年前曾在翁學士座師處一見之未及借錄丁酉六月觀前輩錢蔣石問學手抄本因亟為移騰一通而書其後并系以詩

八賦一手蘇君書永豐吾鄉乃佚諸寒牕數典徵志乘惜

哉滄舛難爬梳當時明門開貢舉典肇延祐初元初南人

莪選三場備時定制蒙古色目人試江右額無廿二踰十

入路會行省院自宋以來皆合考官歷試諸琉璃門燭牛

斗墟江西以是科創建考官大儒吳草廬翰林待制持衡

俱楊剛周情孔思鑒裁殊見草廬貢諸生經術定不疎初

試明經經頗聞行高良士目文正行瀆為良士亦有說傳

易象圖許天麓著易象圖茲之八人一班耳笙鏞祝啟交

縈紆紛紛且莫辨譌誣此卷已是元愷徒我欲持之諗粉

榆匡彭佳秀無時無

鍾秀峯紀遊詩

王贈芳

吾吉靈鍾稱永豐昔年猶見鶴舫翁美秀能文起東松詹

巖遠繼會羅蹤詩名尤數羽可工誦芬堂集揚宗風如聽
 古樂驚羣鳥出入李杜誰與同我為之序茲撞鍾手掌絲
 綸 清禁中將母歸去扶吟筇女守按部臨蒿蓬其年丁
 酉其時冬竹馬爭迎有兒童英髦夾道樂融融乘輿層山
 訪林宗山石當門何玲瓏拔地削出青芙蓉小山拱衛大
 山宮人煙千百環西東巖前挂月光熊熊石樓高嵌石腹
 空小洞天巧非人功太守登臨盪心胸大筆親題鍾秀峰
 我聞太守今黃龔甘棠處處嘉樹封况復作記寫青濛萋
 葦秀發咏梧桐詩人所居秀所鍾名山炳靈千載逢待我
 他年得歸農捫蘿攀葛柏追從襍被托君廡下春摩崖歌
 嘯山重重山靈應改舊時容流連勝跡桑梓恭

求志書院落成長歌示諸生

馮詢

隱居居士今無名寺旁崇元觀亦傾終知釋道讓儒學寺
 觀寂寞堂崢嶸當年講學者誰子曰聶鄒錢三先生先生
 願為孔尼父弟子卻事王陽明陽明學本接孔孟良知獨
 闢言精醕拘儒誤會謂禪寂真學錯解騰譏評請將事蹟
 觀史冊美諡赫赫書文成千秋業已在宇宙三子身幸遊
 門庭聶能淡災莫巨寇鄒也幕府參戎兵緒山侃侃抗大
 獄是皆實跡非虛聲吁嗟有明社黨事論說無謂門戶爭
 誰歟所學若三子實能坐言能起行昔聞訪道借古觀聶
 為地主鄒錢朋轉思坐論九華洞此事直與文成并邇來
 古蹟久漸廢是邦文獻猶足徵亟召生徒復大業遂構梁

棟除榛荆因此隱居傍寺院即以求志名堂楹隱居求志
 乃孔語以問先生良或應要知道統重作述非但堂祀留
 香馨忽聞諸生更有請謂宜崇祀羅羣英我嘉後起意倦
 倦忙看日上才蒸蒸我仕未優敢論學欲借道味澆塵腥
 諸生且退我獨坐虛堂兀兀神冥冥

宋義婦蕭氏詩

泉下有夫堂上有姑膝前有孤熒熒一身仰事俯育婦焉
 可無一姑死矣孤死矣婦若並死夫已矣夫不死賴婦不
 死明大義宋蕭氏二解既克體姑心又足瞑夫目繼述之善
 難盡錄錄其大者可以勵風俗指魯蕭困捐義倉穀二千石築杜
 陵屋建合邑賓饋積弱質不能勤王學卜式輸粟捐海疆

萬千

二三解我來觀風表孝表忠奉慈訓婦姑遺囑廣行義事得軍功

軍需

議叙吁嗟義婦兮巾幗而英雄四解好義心婦勿衰由此義

事擴而推我更為婦進一詞五解詞若何是國帑豐邑百千

萬戶富者易急公貧者不能無所仰盍助諸鄰里鄉黨六解

我詞傳出婦曰然代最疲戶免官錢計代完錢糧二千金窮民不知

婦德但謂今年催科不到門七解黃金十萬豈輕擲要對先

人地下無慚色賢而多財易損德此意或者婦能識八解

廬陵兩世節孝行為李茂才伯熊作 郭儀霄

嗚呼忠孝而外節最苦君不見劉氏之女李氏母十四歸
 門痛失所天生非生死非死家四壁立如洗慘慘未亡人
 遑恤厥身覩此藐諸孤誰衣誰舖三月榆羹杜鵑如血七

月寒衣歲時不缺惟母拮据儲此祭掃資嗟嗟李母節孝
勞且慈茹苦惓惓廿九年花開花落淚漣漣子孝婦順姑
且老無何媳復孀視阿姑日月在長前後三十六載辛苦
備嘗哀哀姑媳兩世節孝

帝所滅我我棹楔千古光吾聞潛德之後塞必通君不見
蔚將興李伯熊

徐潭弔劉忠愍公 球墓在安福縣西三十里 阮文藻

華表歸來鶴能語石人面立啼秋雨獄中血裙三百年青
燐閃閃飛出土奸璫立威事邊陲麓川一疏公瀕危倚撫
罪名苦不得攬權況復攻其私不嗾亦怒嗾尤怒德清枉
作宵人附片紙付獄俄成齏齏骨鮮埋處丈夫死肯

累他人屏間何用詈申申撫棺哭殺鍾家婦悔教夫婿作

懦臣 同時有翰林修撰鍾復約偕上封事公往約復已他
往妻從屏間詈曰汝自上疏何累他人為公獨上死

於獄無何復亦病死妻悔之哭
日早知爾曷若與劉公偕死

黃牛嶺弔李忠文公 時勉墓在安福縣東五里

物換星移何所有鄉農猶知李祭酒祭酒如醕能醉人經
生武夫齊頰首不解何事忤權閹伏闕幾次嬰鋒鉞金爪
亂下腰脇折此舌猶存口難箝詔縛天牢危自保一夜新
君索諫草太息侍讀能忠言促賜金錢成史藁君恩如海
更如山國胄雲從肅講班芟枝動引官家樹荷校三日恩
放還滿朝都惜先生去酒幔河梁人塞路尚望清時能再
起誰知宿草旋封墓墓門有棘還集鴉何怪鵜梁濫廁朝

土木倉黃駕北狩不見鑾回恨未消英宗北狩公上迎還車駕復讐雪恥數事

景泰褒答而公已卒

進士第一堂

張鳳翹

三百餘年宋鼎革進士第一何止百誰似文公最赫赫狀元宰相世罕倫如留夢炎亦其人萬載徒以資罵噍

回仙樓址

在府署前世傳舊有樓呂洞賓遊宴其上後因樓址為回仙觀今廢久矣

徐湘潭

仙人馭氣凌空飛餐風吸露遊無涯天上豈少瓊漿斟下飲凡酒夫何為忍俊不禁忘町畦俗眼不識杜德機過後方知仙蹟竒三醉岳陽曾留詩鶴樓興酣拈笛吹吉州亦復弄滑稽唐巾長劍佩陸離卷波浮白灌漏卮對酌想或

偕鍾離毋乃婆心思度誰塵埃物色仙骨希下樓倏忽去莫追異事喧傳驚里閭金帛珠璣爭拋施因樓為觀高崔嵬切雲射日晃華棖莊嚴道相極威儀祇今故址認依稀歲久并無瓦礫遺遊人指點生嗟咨神仙亦隨運盛衰豈知神馬與尻輿遍大千界無成虧世人測海輒以錐執跡認履卽已非昔本不住今亦來區區香火等唾洩仙聞吾言當解頤

忠義祠

在螺子山下祀文忠烈公及同事諸忠義趙時一等共五十五人

五十五人同一堂其間大半生吾鄉當時諸公早見用宋社不於德祐亡矢及城下詔勤王義旗一旅惟豫章文公官不過提刑起義後乃開闢權本兵趙鞏諸公多從未秩

起感激忠義扶危傾或參幕府或偏校破家犯險義各效
嗚呼於時宋室事去矣諸公欲吹死灰起父母病豈忍坐

視文公以此無奈天意方有奇渥氏精衛銜石海無底或

以障亡或以不屈誅或以勢急自裁或以勞瘁死逃而存

者偶然耳隱身又或別有以無機可乘心乃已其初亦豈

自分有活理彼夫以死勤事例得祀終作遺民於義亦無

訾推跡原心總同揆中丞一奏義誠偉直為萬世標臣軌

當使貪生怯懦之徒瞻拜類有泚祠建于明孝宗時從副

之獨憐當日考古未博採遺名班班見雜史同享併不及

難弟噫嗟乎興亡氣數難推循末運何代無忠臣孰如文

公萬折不變窮艱辛鼓動豪傑響然臻吾考文和所列以

外尚有人後死之責異時當補陳正德初大學士泰和尹

至文公弟天祐十五人於記未然尚有遺者即趙禮部光

薦文丞相幕府忠義傳所載亦未全取不知周中丞與尹

文和二公何以皆考之不詳而尹公又不以所知者言於朝增入之何也

解孝廉省齋丈招飲席間承詢列郡中自來文學之
雋粹粹未得盡退輒於燈下次為韻語即贈

徐湘潭

吉州文物盛宋明叶開天不祗首歐陽從前作者等勝廣

修端而下殘編亡洞晦匡山有遺跡官闕訛錯難考窮叶

羅韜事詳張實山學士集中然所陳岳父子南唐彥劉洞

紀朝代年號官名俱參差叶詩有浪仙風叶昭慶才鋒軋鉉錯楚金設鳩何不臧櫛溪

上世著法語鼎臣作序深夸張宋初擅名有太博彭江西

三瑞題朝堂充公諸子稱發
裴乾曜寥落著述喪輿地廣
記出恣手樂史一書應走僵
葛生頗為山谷喜難與徐洪

共評量黃文節令泰和時敏修嘗從遊
龍雲山人亦才傑南郊禮賦
晞班

揚庭老王氏邃禮學辟雍
裁定羣議忙盧溪工詩且精
易

天厄其書使不彰王敷文易解歸篋中及詩禍起禁卒疑為貨挈以行他日公嘆曰天厄吾書

南渡胡忠簡公楊文節公揮大筆平園相國尤擅場老鶴舉吭

喧嗽息温雅更於館閣良靜
春墨莊世篤學子朱子引為

良朋叶廬陵醇儒劉黼與許子春徒有名字附晦翁叶見

二羅俱號博雅士泌長源有子光縑緇淑謙咏梅

滿千首片羽并不覩吉光段子歐陽伯威詩名赫同姓四

傑彞最雄叶奕弁彞德隆韻學軌最正孫氏著者奕光庭叶

奕有示兒編光庭有甲乙丙後先別稿詠齋高足王子俊才太初詩冠八邑

強王泰來劉辰翁之師也嘗稱其詩為廬陵八邑之冠二劉布衣氣跌宕叔儗長歌

短咏噪湖江巽齋首掌鷺洲院信國須溪皆門牆幼孫炎

午兩王子生祭丞相辭激壯叶知炎幼孫丞相友也今人只被執幼孫謁於驛舍生祭之左元代風流稍衰謝吾邑曾

皆儒望學睡授詩清江范智雖過師亦濫觴范德機學詩於楊學睡

其餘翹楚尚十數曹鄮淺陋非雄邦當時鄉國有宏獎吳

文正虞文靖公集中勤表揚吉安得名之士概見希呂羅蒙

亨遠周震生稍後紀述離亂何慨慷文江更得靜思郭銍

詩亦同調多悲傷光弼張不為明祖屈酒酣高吟聲琅琅

麟原子讓禮王並完節奇氣碑硯凌括蒼謂劉青田也詳見明詩絲緝評中

勝朝爵第最吉郡起家往往登公卿叶台座大率皆魁杰

風猷不盡兼文章就中制作推鉅手吉水之解泰和楊解

氏多才翳元代觀我淵靜詩淵三先生皆著宿文毅海外馨蒸嘗聞安南國尊公

為先師人人稱解夫子東里發身匪科目文追六一詩亦昌挨宿當

日傳諧語廿八人難掩文襄莆田彭惠安贊周公云學博而遠浦乎有容二十八宿誰

能右蕭公鑑其父獅亦能文安俊爽奔驕驕劉公宮師

詩體有家法詩宋景濂極稱之唱酬獻吉毛東塘襄懋

洞山宗伯體宏暢青螺尙書才英剛忠肅李公邦華未暇攻筆

墨留丹一集血淚浪十二狀頭半作者一峰文行洵無雙

光大雖庸有詞藻子啟華采冠夔龍叶詩格清勁陳少保

文矩修雅彭東瀧教其他庶僚數卓犖槎翁詩壇伯江

鄉昌祺色韻頗相類評者謂似段太常子諒精博紹乃父

周主事愷庶子兄弟連鑣驥述孟簡大紳極重王欽止六君

子傳亦悽愴劉樸周霖廖存廖紀善遺詩足風韻長安一

篇追初唐周是忠文教範婉文定當時有南陳北李之稱扶風數章

饒古香文肅錢侍郎典文凡十次弇州所誇猶未詳升庵

傾倒執齋集劉尙書王詩最崖古風摹子昂郭太常汝霖所居距

予甚近予嘗見其遺集將與宋華陽儀詩亦不顯五言學

其族裔儀霄孝廉謀刻之

選入廡廊隆慶以後運寢弛泗山獨以制藝倡蕭郎中瑋

富能風雅二賀競爽遇不通叶中同社數子盡英俊尤

精詩者馬季房猶巖穴儘多奇逸士才不偶命姓名荒明

吉安府志 卷五十二 藝文志

代講學風獨盛研精性體窮微茫獨探本實繼詞翰別次
其侶纔相當整菴固守新安說 聖朝舉祀孔廡旁餘

儒宗旨大較合良知說本餘姚王達夫晚年能先覺文恭公

驂斬更得兩文莊歐陽塘南王時槐蒙山陳嘉謨俱超悟胡正

甫亦高韻頡直矯矯貞襄資體邁惜當本兵形助勦鼎足

高忠憲公顧端文公鄒忠介議論凜豁森風霜寬哉大山古狂

士梁汝元驚鳥含憤喙孤凰更疑山農顏氏子說部一例嗤

妖狂惡直醜正士多口嘉穀毋乃誣莠稂郡境古屬楚越

地荒僻無稽本蠻疆近數代來榮可紀東南鄒魯休風洋

表崇鄉先義取備真不朽亦豈能眾叶 國朝人才亦迭

出定論有待吾未遑劇怪諸賢後率替獨欣君家世澤長

文毅去今四百載代多德類傳青箱丈即文毅十二世孫先大夫早

拳巍第鑑溪先生儒吏到處歌不忘丈人蓄懿未大耀廣文官

冷道尊隆叶令子鳳池染翰出文孫觸目皆瑤瓊叶螺岡

鷺渚精不歇應有極盛繼前芳走也嗶嗶妄自異尚論干

古敢縱橫叶方人三尺空有喙誠交百怪應入腸輟草展

哦還起舞天空月爛星吐芒莊子邱願有喙三尺韓詩精誠忽交通百怪入我腸

五言律詩

白下驛

唐王勃

下驛窮交日昌亭旅食年相知何用早懷抱即依然浦樓
低晚照鄉路隔風煙去去知何道長安在日邊

江上時至豫章還曲江經廬陵

張九齡

歸去南江水粼粼見底清轉逢空闊處聊繫去留情浦樹
遙如待江鷗近若迎山川別有趣況乃濯吾纓

送王牧往吉州謁使君叔

李嘉祐

細草綠汀洲王孫耐薄遊年華初冠帶文采舊弓裘野渡
花爭發春塘水亂流使君憐小阮應念倚門愁

送裴郎中貶吉州

劉長卿

亂軍交白刃一騎出黃塵漢節同歸闕江帆共逐臣猿愁
歧路晚梅作異方春知己鬱侯在應憐脫粟人

送梁郎中赴吉州

遙想廬陵郡還聽叔度歌舊官移上象新令布中和看竹
經霜少聞猿帶雨多但愁徵拜日無奈借留何

送王郎中之官吉水

南唐 李建勳

南望廬陵郡山連五嶺長吾君憐遠俗從事輟名郎移戶
多無土春蠶不滿筐惟應勞贊畫溪峒况强梁

吉水作尉酬高援秀才見贈

李中

佐邑慚無術敢言貧與清風騷誰是主煙月自關情卷箔
當山色開牕執竹聲憐君惠佳句資我欲垂名

吉水寄閻侍御時公謫官瀑川

何處懷君切令人欲白頭偶尋花外寺獨立水邊樓不得
論休戚何因效獻酬吟餘興難盡風笛起漁舟

舟次吉水逢蔡文慶秀才

別後音塵斷相逢又共吟雪霜今日鬢煙月舊時心艤櫂

夕陽在聽鴻秋色深一尊開口笑不必語升沈

送姚宰任吉州安福縣

釋無可

落絮滿衣裳攜琴問酒鄉挂帆南入楚到縣半浮湘吏散
翠禽下庭閑斑竹長人安宜遠泛沙上蕙蘭香

送葛源之泰和主簿

宋穆修

勿嘆從卑位聊欣適去情秋風九月急飛鳥一帆輕
江鱗活杯嘗楚釀清繁華莫回首寵辱正堪驚

魏奉禮昭文知吉州龍泉縣

排律

楊億

平昔登龍坂因緣識玉人庭中華轂滿膝下綵衣新少列
悲先露高堂泣累茵嘉賓碣館閉遺業寢邱貧弓冶傳家
久絃歌罕邑頻循良同漢吏惠愛及齊民又出夷門去還

臨贛水濱不須輕百里自古應星辰

代書寄歐陽永叔四十韻

排律

梅堯臣

始謫夷陵日當居建德年一書寃逐客四詠繼稱賢自思
臨江微相逢莫我先白醪封畫榼素鯉養泓泉戒吏收山
栗呼童惜沼蓮只期東浦過共醉小溪邊日日占風勢時
時到水壩安知貪挂席不肯暫回船自爾皆無定歸與亦
未然指程幾一月沂險歷三千魚鳥都難問音塵杳莫傳
囚之走羸僕試與訪南遷比及過牛峽還聞迎壁田報言
雖不獲言語喜多全我解歸堯闕君移近漢淵問塗曾未
遠命駕亦何緣衰野今行矣隆中有待焉鄉亭瓜接畛風
化蟻同羶即欲朋簪盍翻為俗事牽愛嬰嬌啞啞嗜寢腹

便便雞黍煩為具輪轅豈得前寄聲勤以謝幸子恕而憐
 來貺誠為望論情恐未捐嘗親馬南郡果謁謝臨川遂得
 窺顏色重忻論簡編聊咨別後著大出篋中篇問傳輕何
 學言詩詆鄭箋飄流信窮厄探討愈精專道舊終忘倦評
 文欲廢眠豈知主人貴但見左魚懸所至同風月相歡憶
 澗瀝清歌嗟在耳素髮怪侵顛翠堞時登眺芳洲屢泝沿
 難醒撥醅醪殊厭落頭鮮坐竹聽啼鳥臨流聒嘒蟬孤亭
 起歸夢南陌去揚鞭出餞陪雙旆方靳歷廣鄜始生山吏
 敬頗釋利塗適會面辭何吐離膺事已填空餘郡樓望野
 色際平煙

送劉元忠學士歸陳州省親

芸香閑秘秩蘇合著新裘公子言歸日天王賜問優治分
 周太宰禮重漢諸侯拜慶無如樂黃金作酒舟

挽劉丞相

歐陽修

南國隣鄉邑東都並雋遊賜袍連唱第命相見封侯念昔
 趨黃閣相看笑白頭盛衰同俯仰旌旒送山邨

寄致仕歐陽少師

排律

曾鞏

四海文章伯三朝社稷臣功名垂竹帛風義動簪紳此道
 推先覺諸儒出後塵忘機心皎皎樂善意諄諄大畧才超
 古昌言勇絕人抗懷輕紱冕澁懇謝陶鈞耕稼歸莘野畋
 漁返涓濱五年清興屬一日壯圖伸北闕恩知舊東宮命
 數新鸞鳳開羽翼驥驟放精神曠達林中趣高閒物外身

揮金延故老置驛候嘉賓主
 西湖月勾留潁水春露寒
 消鶴怨沙靜見鷗馴酒熟誇
 浮蟻書成感獲麟激昂疏受
 晚冲澹赤松親龍臥傾時望
 鴻冥聳士倫少休均逸豫獨
 住異沈淪策畫咨詢急儀刑
 矚想頻應須協龜筮更起為
 生民

社日奉寄君庸主簿

黃庭堅

花發社公雨陰寒殊未開初聞燕子語似報玉人來遮眼
 便書册挑龔欺酒盃傳聲習主簿勤為撥春醅

南遷題吉州剛應侯廟柱

陳剛中

疏爵新剛應論功舊石材能形文母夢還訝佞人來海市
 為誰出衡雲豈自開乞靈如見告逐客幾時回

通志案云
隆祐太后

避金兵舟泊吉州石林廟下夜夢神告曰速行敵至太后
 驚悟即發舟指贛金人追至造口不及而還事定封廟神
 為剛應侯剛中以胡忠簡事牽連被
 謫安遠故詩中云云後竟死貶所

初伏闕上書得旨還鄉上楊守祕書 劉 過

郡大廬陵古分符得秘郎
 息爭民珥筆課最米連橋水隔
 蓬山遠風凝畫戟香少須官
 事了歸去玉為堂
 百計歸無策誰知禍有胎
 江河周顛泣城郭令威來訪舊
 髮俱白過家心欲摧故鄉非
 不好不是錦衣回

投周益公

王 阮

洛中九老後林下一人閒
 蘇家易鐘鼎泉聲先珮環
 禪從止水定詩挽正風還
 卻為午橋借借無螺浦山

過皂口

楊萬里

贛石三百里春流十八灘路從青壁絕船到半江寒不是
春光好誰同客子看猶須一尊深并遣百憂寬

歐陽伯威挽詞

酒魄飛穿月詩星流入脾豪末無一世貧不上雙眉瀘水
奇唐律香城賞楚辭前身定東野又得退之碑

擬吉州解試秋風楚竹吟詩

排律

客子正行日偏逢楚水秋一風來瑟瑟萬竹冷修修吹作
清霜骨聲酣古渡頭班林寒裂碧植節爽還幽亦復披襟
快長懷落照愁少陵詩思苦送別更冥搜

送陳約甫知永豐

葉適

四十未朝請三經綰縣章嫁頻知子熟醫老悟身嘗菊趣

行時色梅催到日香還欣肺氣減中熱變為涼

永新道中

葛起耕

冉冉螺川路茲行本不期地平風到疾山僻雪消遲漸遠
鄉人少初行歧路疑斷雲無意緒直欲上梅枝

禾川秋興

歐陽鈇

生計嗟烏有誰人問子虛西風五更雨南雁數行書衰朽
兒童笑飄流歲月餘秋深新病起吾志在吾廬
夜起集萬感胡為淹此留詩成夔子國人在仲宣樓絡繹
聲中淚芭蕉雨裏愁遙知屢門倚應念有方遊

永新彭時甫館僕於玉峯樓龍子崇來話舊

戴復古

暫艤溪頭棹來敲月下門江湖十年別故舊幾人存聽雨
夜同榻論心酒一樽不須言世事萬慮滿乾坤

和趙吉州三首

劉克莊

學者當窮理工詩豈美名不能裨采訪徒自取譏評責己
希韋孟休官慕向平如今成病鶴垂首噤無聲
憔悴東陽令區區謾自疲斷無問牛智寧受放魚欺儉陋
交遊笑低平父老知向來子元子鬢鬢是吾師
今代廬陵牧蒼生屬意深胸中絲補袞肘後藥成今僕自
操齊瑟公宜和舜琴篝燈精舍裏何日共論心

快閣書呈吳宰

徐鹿卿

千里章江路登臨獨此雄清波長夜月落木又秋風浪蕊

浮花外盟鷗狎鷺中詩魂蘇醒在千載豫章公

文山卽事

文天祥

宇宙風煙濶山林日月長開灘通燕尾伐石割羊腸盤谷
堪居李廬山偶姓匡知名總閒事一醉權滄浪

衡州送胡端逸赴潛

時八月十五發兵討賊端逸廬陵人

楚觀簷花曉舟人擊鼓東蛟龍喫靈雨鷗鶚展雄風此客
雲霄士斯文造化工捷來君飲此我亦凱元戎
西風吹感慨曉氣薄登臨半壁楚雲立一川湘雨深乾坤
橫笛影江海倚樓心遺恨飛鴻外南來訪遠音

將母赴贛道西昌

重來鷗閣曉帆影漲新晴倚檻雲來去開簾花送迎江湖

春汗漫歲月老崢嶸手把忘憂草夔夔繞太清

白鷺洲

元何中

淡淡薰風起江明天影開竹陰侵水碧草色近人來諸老
心猶在十年首獨回非無李供奉却欠鳳凰臺

和張提舉題安福書閣

劉詵

高才成政譜美傳起儒林禮樂乾坤重文章日月臨一官
驚道屈期月見功深珍重經行地甘棠樹樹陰

和羅士奇遊洞巖見示

昔往興遄盡今遊期末齊天連華蓋起山抱白雲迷樹老
時來鶴星低半在溪故人題筆在遺墨似鴉棲

文安溪宣慰

身世從違夢功名毀譽資平生惟客在後死有兄知危涕
秋風遠華顛嶺海期空餘千載意不得盡吾詩

劉須溪大博

蚤日驚吾洛餘年畏有聞蹉跎臣結策流落大蘇文世外
風流盡人間論議分豈無千載淚不得灑公墳

鄧中齋侍郎

海上青油檄城中白髮簪百年重得老萬事獨餘心過客
門嗤鴈遐荒字抵金平生俱莫料造物意何深

櫟社草堂成次署丞韻二首

周聞孫

伐木驚春冷披榛得燼餘三間楊子宅七世伏生書谷口
慚招隱花溪憶釣魚自傷車馬少未敢大門闔

吾廬經久廢過客盡相驚草引青池台門隨小徑成生還
稱地主亂定識人情庭樹全消落西風折紫荆

擇勝居求舊開荒住少鄰落成非易事經始愧前人喜報
狼煙息愁聞虎跡新寄資深有待寒谷未回春

寄題永豐劉氏暖翠樓

揭傒斯

孤亭萬竹中危坐自生風近與山光合遙連野氣通鳥啼
深不見泉響靜偏聰束帛休相污先生道未窮

憂懷

周霆震

黃落雜煙蕪林炊乍有無喪氛移步滿兵氣幾時蘇小邑
疲封拜窮鄉落饋輸切深資病減閑坐較靈樞

閔新安

路人顛微步原塗枕積骸孫恩將入海新安岩王孫本立李祐起

平淮紅巾首李昭犇潰蛾投火攀援蟻附厓熊兵聞禁暴坐覺

眾心懷

寇至

羣醜發禾川中宵羽檄傳纔收綠岸戍已漲近城煙掠貨
舟相次歐人騎獨先兒孫猶九口兩地寸心懸

辛巳夜坐有感

劉鶚

團團月當戶蕭蕭風滿林夜寒鄉夢遠霜重漏聲沈孝子
終身淚忠臣到死心承平春似海豈料有而今

題宋仁宗御書濟美堂賜進士毛偕 黃彥肅

濟美懷先哲光華照古今奎躔遺翰墨簪紱耀山林花雨

流芳潤簫韶雜鳳音故家文物在清賞愜餘吟

讀文山丹心集 名媛附

鄭氏允瑞

藉甚文丞相精忠古所難舍生歸北闕效死只南冠血化
三年碧心存一寸丹偶攜詩卷在把玩為悲酸

快閣春望次王子啟

明劉崧

使者徵兵去居民避地回南風猶鼓角北岸自樓臺白水
晴雲動青山暮雨來百年舊城郭臨眺獨興哀

玉華山

翠巘千峰合丹崖一徑通樓臺上雲氣草木動天風野曠
行人外江平落鴈中傷心俯城郭煙雨正冥濛

題環秀山房 排律

梁潛

聞說幽居好青山四面看遠村如栗里深谷擬王官芍藥
開新塢芙蓉滿舊灣水聲晴作雨嵐氣夏生寒傍澗還栽
竹開畦更藝蘭池荷堪製佩園籜可裁冠載酒邀人飲攜
琴掃石彈閒情長自遣世慮不粘干鶴唳青邱外猿啼綠
樹端何由過玉筍清論罄交歡

小莊道中

王沂

客路千厓裏春風二月中虎蹄荒逕少鶯語故鄉同澗水
縈迴綠山花自在紅物華空滿眼去意只怱怱

雲峯寺次劉子高韻

蕭執

初陽陟層巘松徑劃然開涼飈動嘉樹飛瀑吼晴雷避俗
僧初定看山客正來兒童披短褐顛倒掃莓苔

龍仙寺 有序

古傳寺鐘與龍鬪田中鐘不能勝穴地而逃止於青原白鷺之間其穴至今尚存徑三尺許泉水湧出人言其無底焉寺以此得名

梁蘭

古寺名空在依山只數椽鐘逃猶有穴龍去已成仙古礎

埋春草廻塘落澗泉諸僧離亂後頭髮也垂肩

遊尊勝寺簡略師

梁混

四境人煙廻禪宮一逕遙架橋通窈窕飛閣歷岩堯日暮

黃雲合秋高碧樹凋遠公眞靜者塵外數相招

望武山佑仙觀

周是修

天上神仙府人間道德門水分千澗遠山拱一州尊松鶴

忘寒暑留龍警日昏何時登絕頂瀟灑望乾坤

送陳生歸吉水赤岸

李昌祺

清砧兼落葉總是別離情去路千程遠歸舟一葉輕秋雲

連樹暗寒日映川明亦有滄浪興何時共濯纓

金牛坡

胡儼

昔自五丁鑿今看臨白雲落花紅點點芳草綠紛紛函谷

虛陰勒華陽空彩文仙家多變化種玉不耕耘

西華

周述

一別西華久重來紫府開清風吹客袂斜日映仙臺人去

雲猶住山空鶴白廻故人同眺覽終夜獨徘徊

西壩草堂爲廬陵宋內翰賦

黎擴

聞說西谿上春風小院開野蠶成繭盡江燕引雛廻竹裏

圍碁局荷香沁酒盃晚涼疎雨過隨意步蒼苔

南村別墅為饒松坡題

羅倫

吾愛南村好頻過處士家白雲留客住濁酒隔牆賒陰壑
藏春雪清溪洗暮霞自今來往慣薇蕨早生芽

何孝子廬墓聞而有作

羅欽順

風雨青山夜苦寒病骨臞精誠驅魍魎嚴衛仗於菟報德
小何極旌門詔有孚孝經餘斷簡長此奉訏謨

謫文信國祠

歐大任

憶昔南冠日厓山恨未忘魂沈柴市月淚盡剗門霜白鴈
銜江草黃龍逐海航中原冠劍在歌舞待巫陽

自江口兼程赴毛汝礪約

周廣

野燒連天赤舟行當月明燭殘花墮泪江靜櫓飛聲赴約
酬新願論文續舊盟松筠有貞性還共歲寒情

寄毛汝礪

竹寨嶺雲高雲中隱一巢有時堪翫適無在不逍遙杖履
迎梅玉江舟破雪濤平生憂國念今欲問漁樵

神岡

劉教

百年已過半古寺作初遊蓮社何心結春山此處幽天開
千里國日湧二江流若但矜行樂談空亦外求

公甫感秋吟因寄章德懋莊孔昌及倫三人用次其

韻寄呈

羅倫

大地秋氣動萬竅無定音山河孤鶴夢風雨一龍吟青眼

吉安府志

卷五十一

藝文志

三十一

吉安府志

卷五十一

詩徵

三十一

有此客白雲何處心思君令人老華髮幾千尋

忠節祠前誠齋先生手植羅漢松 羅洪先

移根自祇苑遺愛為誠齋曾借琴書潤猶當俎豆借地靈
人自美風古色逾佳翦伐寧須戒伊人眾所懷

古佛堂

如何鹿苑會翻為蠲舟催我問雙林下徒傳一偈來蘭薰
猶滿室花落自空臺度筏今何處因之覺性開

龍洲讀書

胡直

窈窕繁花路高虛野甸居漸為逃世客懶答故人書水閣
依鷗鳥塵編養蠹魚日尋垂釣侶長在月明初

上吳楓山先生幽居二首

劉枬

結廬山之阜臨眺當樓臺野雀羣雞啄藤花上屋開閒居
何用賦窮鬼敢相哈吾鄉徐孺子疑爾後身來

蓬廬帶荒廓瀟灑入烟林園有橐駝樹囊無陸賈金白雲
不改色流水自成音我有高樓興因君感素心

遊河園謁羅武岡公祠

陳英策

故事標青史新詞竦翠微竹風清爽籟花露滴晴暉今古
有忠佞江山無是非英靈耿如在化鶴定來歸

黃竹臺

劉陽

青山憐我僻隨處榻堪移月下吟黃竹雲中茹紫芝神仙
閑與借天地靜微窺浮世孤踪處崖雲松鶴知

天香臺

澗遠藤蘿古崖懸松柱存向傳黃太老疑卽晉仙君夜壑
生靈炬秋壇尙紫雲連峯登十九真愜半生聞

遊圖坪

王時槐

逶迤千嶂合突兀一峯高獨躡雲霄迴寧辭杖屨勞夜寒
星傍幘天近月侵袍此夕憐人世無心到桔槔

舒家企望蘇黃臺臺在鳳岡北金錢池東蘇公舊有
謝道士贊袂馬歌二石刻存清都道院

陳嘉謨

蘇黃千載後山水九秋長名姓兒童識煙霞詞賦香金錢
留翠壑鳴鳳在高岡剩有風雲護藤蘿暗自芳

西臺寺

古西臺寺今惠祐廟也以其高平在章江之西故名南朝陳吉郡守劉公竺生祠今西臺寺也公守郡時政暇自郡治登山習靜有二白鹿隨車生祠卽公習靜處公既歿助國福民靈爽大彰郡人名山曰神岡以不忘公而拓生祠爲廟久之聞於朝以其隘也於是移寺於今地而勅有司廟於高平之處嘉靖初尙有廟祝周姓者家寺之東廟之西予售周氏地重建亭堂顏魯公嘗一遊青原山山谷賦之云事如飛鴻在名與南斗借矧公賞勝茲山久矣公固存也

修竹西臺寺前朝太守祠我來尋勝蹟事往見殘碑舊賞
青山在仙蹤白鹿隨空令人代裏懷古有餘思

永和以儒林名鄉以儒戶註籍者三家其地有夫子

廟講經臺皆宋時遺址金錢池以蘇黃名龍窟一

名石窟以文信國降神之地名春日自舒家企之

清都觀道士乾元爲予指點遺跡云

言安所記 卷三十一 詩徵 三十一
選勝白雲隈尋春花裏來杏紅夫子廟草綠講經臺池水
金錢滿山泉龍窟開廢興人世事千載一徘徊

蘇黃臺

蘇黃何處所空有水心臺景是穿雲入春因過雨開石牛
真浪跡金馬尚遺才流落成千古浮榮安在哉

答張肅之吉州見寄

黃汝亨

秋夜正懷人圖來五笑新江山天外想詩酒夢中親世態
翻無定交情老愈真翔鴻元自適不必慕雷陳

青原山

朱維京

小徑通初地城南五里慳一泓清似玉亂石錯爲山待月
人何在樓霞客未還惟餘春夢闊來往水雲間

大平山房

鄒元標

鄰曲兩三家晨昏共歲華春來烹細笋雨後試新茶嘯虎
成朝市林蜂散午衙居然寂寞意靜景得無諱

解春雨學士舊墓

先生天下士磊落可議論氣節千秋壯文章百代尊有才
匡聖主無墓弔玉孫多少高山意空留片石存

鄰家相過悲喜交集里中無一人順賊者賊騎過而
去之大兵尋至江干不擾吾里淳樸吉祥之氣所

感平作詩紀之

劉同升

瀕江家共住憂盜復憂兵人喜能安堵天心最好生玉鈴
慙未學榆社豈聞鳴荆坐同疏屨皆予好弟兄

遊研鄰却贈二首

國朝 魏 禧

名賢供客玩因見主人賢曲折情相引參差斷復連盤廊
花映石複閣水如天坐此可忘日一年當兩年
蜿蜒紛麗藻不信亂離時面面轉相向疎疎更自宜接談
無俗韻為樂有如期獨笑閒遊客開船只恐遲

春日過青原從遊者李守潘周二郡丞

趙進美

曲折千巖過幽尋一徑開石林懸殿閣風磴出莓苔澗冷
微芳發天青獨鳥來梵聲隨磬落植杖更徘徊
窈窕層崖外聞鐘未到門曉煙開石面春泳擁山根幔卷
雲通閣橋回樹隔村惠休誰不忝幽意一相論

回徑歌斜斷長林偃翠微近山休小隊入寺減春衣野老
來相訊沙禽去自歸傍筵雙蝶在還共雨花飛
野澗通簷溜春陰覆幔坡侵衣芳草潤穿竹暗泉過池影
涵階細松聲接梵多諸君興不淺吾醉亦婆娑

登神岡山

幽尋隨短楫江路翠微橫飛鷺依霞遠征帆帶樹明水雲
晴入寺山氣曉浮城農舍清沙外開林見耦耕
石梁連薜荔岸幘立徘徊地轉孤亭出沙明絕壁開江聲
二水合郡勢萬山來祇樹聞鐘近春風淨綠苔

初夏雨後遊青原山

李元鼎

青原青未了把臂入林深路折皆逢渡山環不辨岑高崖

奔遠瀨怪石冷斜陰嶺外樵風發松林起梵音
茅菴成午憩一飯結僧緣開徑人何在磨崖句可傳筍燒
雲外玉茗煮雨前煙歸路非來路溪流合一川

得文信國羅文毅鄒忠介三先生真跡喜成一律

偶集先賢跡淋漓發古香慨然思異代况乃盡同鄉字挾
風霜氣人爭日月光茲遊殊不負世世付珍藏

隴州 劉晉卿狀元故里

龔鼎孳

一林松吐秀寒翠逼江南地迴蛟龍臥天空雲木參時無
愁甲冑身竟許烟嵐感慨黃麻裂延英萬日談

白沙驛 和空詞韻

驛帶荒潮逝沙吞曲岫清最憐今夜月曠過峽江城捲地

噴陰雪乘風縱旅征暮鴻聲噉噉淒斷客心明

寄李萬安冲淵

施閏章

十八灘頭縣蕭條幾戶存沿江交虎跡亂水齧城根野戍
鶯花斷山嵐日夜昏艱難看作吏念爾一銷魂

石蓮洞

傳聞羅學士子闢此山阿靈虎自安坐避人時獨歌陰巖
斜日到曲洞碧雲多庭館何蕪沒高松遍女蘿

鄒能宏歸廬陵寄訊韞退

聞道廬陵縣雙流直到門江山紛近郭筭橘散沙村風土
詩應笑艱危道更尊螺川歸棹遠愁思與誰論

泰和縣夜泊雷雨

王士禎

明月墮何處忽聞鳴兩懸雷驚殷山起電急劃江圓宿鷺
依連舸神龍出大川戰場蕭瑟極百感夜忙然

萬安縣

戰地餘流水滔滔贛石東幾年紛鱗艦今日尚刀弓沙嶼
宵沾兩江船午帆風明朝聞好語清漲百灘空

青原次韻

笑峯然

地以名賢重山原七祖開高巖冠松檜古樹衣莓苔態險
看逾變聲幽聽更來迢迢還寂歷處處可徘徊
苔徑更春草難尋舊履痕新亭張翠巘流沫濺朱門魯國
書偏古涪翁詩尚存蕙橈蘭榜句好勒上雲根
寺古饒松栢山春偏草花晨光凝碧落麗日燦朱霞鋤斧

垂風範補荆閱歲華何堪冠蓋集雲外老僧家

青原漫興

藥地智

高人來灑墨石竟似雲飛草篆誰人識苔痕何太肥吟詩
嘗入定流水憺忘歸一步休愁滑山風振我衣

待月橋晚歸呈胡心仲

蠡測瀨

板橋常待月相識此寒流磬冷山偏靜雲歸石更幽溪光
搖草屨風露落茶甌拾得霜林意持來問子猷

重遊青原

毛奇齡原名

不信曩遊淺居然新徑通山榭臨水白霜草接春紅飲犢
迷樵路饑鳥散梵宮盤溪三十渡總在碧雲中

贈張箕山學士

鄭日奎

詩徵
三十一
謫去應無憾分攜奈此行平生忠孝事今日友朋情松菊
山中經煙波江上程知君不忘國有夢尚承明

子慧男邀同許堯文羅山人遊青原訪無可大師薄

暮始歸得句

周令樹

登高一以眺林綠萬峰青偶爾逢僧過悠然到祖庭經年
欣握手隔世感飄萍爲厭灘聲惡松風許暫聽

禪室隨高下泉聲乍有無雙橋凌壑起一埵入雲孤仙吏
尋碑額幽人指畫圖五賢祠尚在野日上金鋪

長笑滄桑改翩翩天際鴻荆榮龍象口道在米鹽中有夢
同園吏忘情學寒翁子瞻輕宰相止爲見涸公

漱青峽棋盤石

周士賓

已登千嶺上且踞一溪中過兩山尤翠經霜葉易紅爛柯
誰對手敲橘早生風黑白爭先著浮山問遠公

遊青原和趙韜退韻

張文炳

厭喧尋闕寂不爲攬芳菲荒歲居官苦流年證道稀秋風
元我至落葉向人飛白社如相待柴桑願豈違

一滴曹溪水出南嶽開泉高橫過岸樹老臥生苔僧靜
雲舒卷客閒鳥去來長橋引勝處坐久更徘徊

一片飛來秀巉巖隔水斜亭遲太古日潭定夕陽霞密意
留階樹聞根悟澗花山中晚更好分付與棲鴉

六一堂文謙

排律

李紱

炎宋文章運源流尙足徵百年熙自洽五季弊相仍正始

音難復西崑體可憎艱難當景祐豪傑起廬陵波用廻川
障源看攬轡澄龍門齊逸驥免册掃秋蠅餘子皆奴隸斯
賢屬佐丞廟堂爭范富廊廡立蘇曾居士身將隱斯文道
許承急流辭熱局別墅築寒藤竹簟風微扇茅簷日頗蒸
歸田還札錄載酒記鮓稱歇絕千秋事風流一代能辦香
存翰墨遺跡漫坡滕達者今安在斯堂得再升高文尋髣
髴峻節想破礮地迴驚觀海時遙嘆語冰清言珠磊落白
戰雪憎騰經雅相仇手師資共服膺方欣同酌斗兼慰免
擔簦車服表哀拜窻櫺宛轉憑高山還可仰重與數中興
百家村劉氏廢園

百家村劉氏廢園

聞說勞民力當年闢此園空餘數頃地長傍百家村奇石

稜猶聳遺坊字半昏春風渾老盡啼鳥過閒門

題大仙巖

在永豐縣永豐鄉又名福德巖

陳學海

幽洞開山際江流暗有聲

洞內江聲潺湲

亂峰頭上落絕壁面前

迎徑險垂危磴巖空敞石枰祈年多在此福德故由名

琴亭晚興

朱懷棻

雨歇灘頭渡霞收礮上村亂峰撐碧落眾壑講黃昏危坐
憐花夢孤吟想月魂祇宜吹玉笛那解倒金樽

礮山早行

宿霧靈林麓山高日出遲草根塗虎印樹杪滑珠絲雨後
全添水春深尙冷颼多情輸百鳥一路譜新詞

東山野望

釋成繪

搔首東郊上乾坤一望中地從日落盡山到海邊空鳥斷
飛霞路煙籠棲鶴松牧童鳴篴處樹映夕陽紅

登鷺山

李錫

鷺山邑東南第一觀也山勢磅礴跨新寧二邑上
白石至丹竈及仙人試劍石其尤勝者玉筍二竿
拔地千仞相傳唐有飛仙劉
氏昇於此鄉人歲時祀之

試劍人何處藏書深復深空山來剝啄喬木異晴陰頓息
塵凡慮時聞猿鶴吟可容長抱膝結室白雲岑

青原用趙韞退守道韻

郭良

曉來江上渡水落現沙痕古道雲生石人家山對門青原
宿舍近白法祖關存小憩憐疲馬踟躕老樹根
一塢凌空起飛甍俯翠微函中藏淨鉢架上搭僧衣選佛

曹溪得傳宗南嶽歸如何荆倒插錫向陁崖飛

亦有泉三疊宛如天一壺山川供客醉笋蕨藉僧厨返照
催車馬寒巖喚鷓鴣題詩壓行擔歸路尙踟躕

題保國直言後

金性

明泰和周是修德爲衡府紀善時作上篇勸諸王
下篇勸各王府官屬厥後金川門啟約同好死難
不應獨赴應天府學自經御史請追戮成祖不允
始隱有愧於其言也性校士吉安得所著芻蕘集
乃見之嘆其忠愛激發深切著
明足垂千古鑒戒謹題其後

漢代多賢傅先生足嗣音策陳全國上理奪後王心十族
叨安枕孤忠愧盡簪文山龜鑑在大節應同欽

和立峰綿津灘見釣者韻

又向綿津過輕飄幾葉斜岸依灘石同磯近釣人家舊事

徵魚躍憶甲子過此事微風怯浪花垂綸多靜趣應恠客咨嗟

過萬安縣

袁枚

舟過萬安縣悠然心自開恍疑仙境入只見好山來樹色
千層錦灘聲四面雷懸厓幾茅屋遠望似樓臺

中秋同李公輔登虎山

蔡文詔

不上危顛望安知秋色深砧聲隨聽遠雁影逐光沈水靜
呈魚影山空辨鳥音今宵如有月夜舫可重尋

同彭颺伯遊虎潭

項弼先

逸思宜登勝臨風坐蘚苔筏輕潭影緩峯靜白雲來人語
松聲度山泉茗色開閑中天地闊長日足徘徊

過武陵瀧

若削武陵峯蒼烟嵌壁容危湍巖上下巉砒理奔衝蕩漾
波紋月泚滋石罅鐘瞿培工部憶顧此或喁喁

秀洲道中

杜一鴻

空山新霽後天氣晚來清野水全浮岸疎雲半入城感秋
寧有意行路若為情極目高飛雁飄飄羽翰輕

北鄉行部回至圓峯山雨甚舍車而舟偶成二律

春潦迷村落寒波侵蘚苔半山衝雨過一棹御風回新漲
奔如駛危灘吼若雷岸花零亂處不斷逐人來

濛濛分暝色歷歷俯江聲風壓雨斜點湍洄山倒行滂沱
長不絕煙樹亦無情獨對孤蓬影蒼茫百感生

雨中同友登五雷峯

鄒匡明

聯步躡仙峯淒淒陰雨濃行隨九曲水笑倚千年松酒灑
層霄外燈懸疊嶂中不堪回首望盡是白雲封

盤窩書院明蕭安素先生讀書處也今不可復識矣

余家西溪往還一望良由惘然 周 璵

郭西來往地迤邐舊盤窩嗟我生也晚有人山之阿天聲
攬風雨古意生悲歌金碧誰家者猶云白馬駝

砥英書院次謝維藩孝廉韻 周 培

雅度青霄傍清暉碧澗邊徑風彈竹韻沼月貼荷錢樂事
宜詩酒耽情在簡編獨慚繩武意那為癖林泉

螺川大水口占紀事 名媛附 朱氏遠山

未旱先祈雨時違即怨天人心今乃爾災異豈徒然市虎

方歸穴轟雷又策鞭秧針纔刺半木隸已微全絳水雙流
合平疇萬頃捐城垣驚繫艇黎庶斷炊煙吉水難成字螺
峯僅識巔懸知眠未穩為報席頻遷李郭還同載飄飄江

上仙

七言律詩

留別吉州太守宗人邁 唐 滕 倪

秋初江上別旌旗故國無家淚欲垂千里未知投足處前
程便是聽猿時誤攻文字身空老却返漁樵計已遲羽翼
彫零飛不得丹霄無路接差池

舟行早發廬陵郡郭寄滕郎中 許 渾

楚客停撓太守知露凝丹葉自秋悲蟹螯只恐相如渴鱸

詩餘所記 卷三十一 詩徵 四十一
鱸應防曼倩饑風捲曙雲飄角遠雨昏寒浪掛帆遲離心
更羨高齋久巫峽花深醉玉卮

吉水春暮訪蔡文慶處士留題

南唐李中

無事無憂鬢任蒼濁醪閒酌送韶光溟濛雨過池塘暖狼
藉花飛硯席香好古未嘗疎典冊懸圖時要看瀟湘戀君
清話難留處歸路迢迢又夕陽

安福秋吟寄陳銳秘書

縣庭事簡得餘功詩興秋來不可窮臥聽寒蛩莎砌月行
衝落葉水村風愁髭漸去人前白醉面猶憐鑑裏紅苦恨
交親多契闊未知良會幾時同

吉水縣依韻酬華松秀才見寄

官況蕭條在水村吏歸無事好論文枕欹獨聽殘春雨夢
去空尋五老雲竹徑每憐和蘚步禽聲偏愛隔花聞詩情
冷淡知音少獨喜江皋得見君

送蕭尚書致仕歸廬陵

徐鉉

江海分飛二十春重論前事不堪聞主憂臣辱誰非我曲
突徙薪惟有君金紫滿身皆外物雪霜垂鬢便離羣鶴歸
華表望不盡玉筍山頭多白雲

送侯殿真之官吉州

宋李覲

待詔何年別玉堂筆端渾欲繼鍾王官資未出風塵外蹤
跡曾親日月光扶老只今非遠道薦能從此有封章廬陵
若要高文寫爭得滁州在故鄉

滁州歐陽使
君廬陵人也

奇題沙溪寶錫碑本院作積

歐陽修

為愛江西物物佳作詩嘗向北人誇青林霜日換楓葉白
水秋風吹稻花釀酒烹雞留醉客鳴機織苧徧山家野僧
獨得無生樂終日焚香坐結跏

奉送叔父都官知永州者官字日華

虎頭盤綬貴垂紳青組名郎領郡頻畫鷁千艘隨下瀨聽
鷄五鼓送行人楚波漾楫萍如日淮月開船蚌有津千里
壺漿民詠溢檣烏旗隼下汀蘋

沖之相公拜相

元絳

天聖年中桂籍人而今二十五回春親逢舜燭圖隣弼首
見堯龍秉化鈞百辟望公承約束四方多士仰經綸為儒

富貴皆隆極惟祝功名日日新

宿資福院

蘇軾

月明寫炤寺林幽最是江湖入念頭衣染爐烟金漏迴茶
烹石鼎玉蟾留山星幾點纏官舍僧院百年過客舟封事
未投聖主意長安此夜亦多愁

送郭聖原歸廬陵

孔平仲

文章豪逸難為敵格志孤高自出凡兩歲論交重金石今
朝泣別倚松杉滿江春碧圍仙棹入曉風輕送錦帆此去
天涯皆獨立寂寥相望隔溪巖

寄舒申之戶曹

黃庭堅

吉州司戶官雖小曾屈詩人杜審言今日宣城讀書客還

趨手板傍轅門江山依舊歲時改桃李欲開煙雨昏公退
但呼紅袖飲剩傳歌曲教新翻

次韻君庸寓慈雲寺招惠錢不至

元豐五年太和作君庸太和簿

玉簿看梅落雪中閨人應賦首飛蓬問安兒女音書少破
笑壺觴夢寐同馬祖峯前青未了鬱孤臺下水如空江山
信美思歸去聽我勞歌亦欲東

題神移仁壽塔

十二觀音無正面誰令塔戶向東開定知四梵神通力曾
借六丁風雨堆蟋說冰霜如夢寐鷄聞鐘鼓亦驚猜從今
不信維摩詰斷取三千世界來

題槐安閣

并序

東禪僧進文結小閣於寢室東養生之具取諸左
右而足彼雖聞中天之臺百常之觀蓋無崇妙之
心予為題曰槐安閣而賦詩夫據功名之會以媿
誇一世其與蟻邱亦有辨乎雖然陋蟻邱而仰泰
山之崇嶠猶未
離乎俗觀也

曲閣深房古屋頭病僧枯几過春秋垣衣蛛網蒙窗萬
象縱橫不繫留白蟻戰酣千里血黃梁炊熟百年休功成
事遂人間世欲夢槐安向此遊

子範微巡諸鄉捕逐郡盜幾盡輒作長句勞苦行李
白髮尉曹能挽弓著鞭跨馬欲生風乃兄本是文章伯此
老真成矍鑠翁抱鼓諸村宵警報牛羊幾處暮牢空得公
萬戶開門臥看取三年最治功

萬安道中

彭汝礪

上下雞籠牛口灘灘頭濯濯雨聲寒氣蒸晚日雲無間波
漾春風雪未乾落絮並花浮遠水飛鷗隨鷺落驚湍扁舟
穩汎滄浪遠珍重巖陵一釣竿

魏彥成座上忽見擒至吉水賊奉呈彥成

王庭珪

城上啼烏曉欲狂樓前爭看捷旗黃略驅部曲千餘騎不
折將軍半段槍樂土異時為賊窟太平今日有官方弱翁
治行今如此何待天邊下鳳凰

和趙叔清登殷仲堪讀書臺

晉朝人物渡江初為郡風流只載書臨水重開數問屋宿
兵仍富九年儲英豪系出三公後磊落胸蟠萬卷餘東觀

諸郎未堪比登車不落問何如

送頓子還廬陵

頓子遠來夜郎省余聞其婦方臥蓐不欲久留而
戀戀不忍去乃令上沅湘至昔人窺九疑處得下
武陵溪入荆州山以陵武昌洞庭黃帝張樂之野
觀開闢以來造化孽山瓊雄怪譎之處却由瀟湘
以歸徹廬作數語
示之明日乃行

東歸未辨武陵舟送汝翻成一段愁雪點敝裘騎瘦馬春
寒幾日到荆州湖山天闢洞庭野吳楚月明黃鶴樓莫苦
回瞻白雲嶺茲行聊學子長遊

次韻向文剛晁叔易遊青原

佛屋深蟠七祖山魯公奇字刻孱顏能來把釣溪臺上安
用賦詩戎馬間薄宦不知何處好浮生纔得此時間夕陽

渡口人爭渡又趨城頭暮鼓還

送胡邦衡之新州貶所二首

囊封初上九重關是日清都虎豹閒百辟動容觀奏牘幾
人回首愧朝班名高北斗星辰上身隨南州瘴海間不待
他年公議出漢廷行召賈生還
大厦元非一木支欲將獨力拄傾
子要為天下奇當日姦諛皆膽落平生忠義只心知端能
飽喫新州飯在處江山足護持

胡邦衡北歸先寄詩二首次韻迎之

無何真是本來鄉莫遣閒愁犯肺腸會見棟梁扶大厦不
將文字弔沈湘揮毫未辨銀為管沽酒奚須玉作餽雙竹

端能作奇瑞衡人宜護竹間堂

當年大册撼天扉聖主今呼逐客歸應是風雲乘此會便

令鷓鴣著行飛久埋劍氣衝星氣暫裂荷衣換錦衣穩上

月墀踏龍尾九霞光裏望晨暉

草堂東橋翫月

坐看冰輪碾太清赤欄橋下水先明光從蟾兔窟中出人
在鯨鰲背上行地隔星門無俗客樓高隣笛有新聲此時
迴絕非塵境更聽天雞第一鳴

題神岡廟

周必大

岸斷川平拔一峯丹青剝落古靈宮邦人歲久忘遺愛賈
客時來乞好風二水有情猶磬折霜楓無數尚旗紅岡頭

故址宜亭樹城郭江山在眼中

次韻楊廷秀待制二首

某思規層宇欲屈故人落之乃未許在駕先貽二詩曲盡登臨之勝遂成絕唱謹次原韻其前自叙其後敬簡因致一來一往之意

十年不待殿東頭
臨水登山隱者流
一服瞳方無異相
三層句曲有危樓
幸殊王粲非吾土
何事龐公不入州
至後臘前天欲雪
扁舟乘興肯來不
官府新辭上界仙
碧瑤洞口晉桃源
默存常在清都境
歸去休無靖節園
為問龍樓并鳳閣
何如佚老及平原
明年大作南溪社
會訪拾遺花柳村

行舟憶永和兄弟

一掛吳帆不記程
幾回繫纜幾回行
天寒有日雲猶凍
江闊無風浪自生
數點家山常在眼
一聲塞雁正關情
長年忽得南來鯉
恐有音書急遣烹

永新賀升卿攜中原六圖相過其論古名將出師道
路形勢可指諸掌為賦此詩

歷歷山河一卷書
博聞疑是古潛夫
金城未入職方考
玉座正披輿地圖
取號不應須假道
勝齊終恐用真儒
從來美璞勞三獻
豈比巾箱襲硤硤

原注君嘗再上書

賀升卿年垂八十以書寄平園新詠二十二篇又錄
十年前簡予四詩尚有訪戴之興謹次最後一章韻
為謝

又與年高豈樂天字隨心正似公權吟詩作賦晴窗裏問
柳尋花野水邊原注升卿居永新田東別墅去縣百十二里喜我新巢三徑就

勞君舊句一時編雪舟有興休回棹共載期追李郭仙

寄題龍泉李氏萬卷堂婚之父

斷簡殘編已可披排籤插架有餘師五三載籍多為貴九
百虞初小不遺潤屋殊非阿堵物傳家自是寧馨兒老來
鉛槧心猶在每憶警書館殿時

病中喜雨呈李吉州

兩日炎暉烈未收連宵甘澍沛如流大田今日非昨日多
稼新秋勝舊秋涼氣隔簾深亦透香煙卷袖散難收看君
小試為霖手便作江西第一州

送實之倅廬陵二首

劉克莊

芻言當日偶然同白首家山各固窮海內僅存一畏友人
間遂有兩愚公似聞黃閣真迂叟且向青原訪醉翁此士
求應無著處栖栖十載六治中

君去江邊春色濃郡花照席萬枝紅守分風月元非贅吏
白文書但託龔黃本何堪處秦觀白麻近已拜申公早歸
了却蘭臺史莫久吟詩快閣中

送吉州大守朱子淵造朝楊萬里

廬陵難治定何如請看黟川朱大夫秋月滿懷春滿面視
民如子吏如奴萬艘白粲何曾欠百雉金城舊更無歸侍
玉皇香案了甘棠便是瑞蓮圖

題安成趙寬之慈順堂

天潢龍種與人殊五鳳曾傳萬卷書象服在堂萱草暖綵
衣上壽棣花初雪中密竹能抽笋冰底寒江更躍魚趙氏
弟兄俱玉樹良齋文字即瓊瑤

寄題萬安縣劉元襲橫秀閣

玉簪成陣雪成堆秀氣橫空撥不開楚岫蒼寒五雲外贛
江白瀉九天來煙消日出皆詩句月色波聲喚夢回早晚
攜家過高閣寄詩聊當一枝梅

賀澹菴先生胡侍郎新居樂成二首

清廟欹斜一笑扶歸來四壁亦元無可憐拙計輸餘子佳
破僧房始結廬三徑非遙人自遠萬間不惡我何須冥搜

善頌終難好賀履真成燕不如

眼高不肯住清都夢繞江南水竹居却入青原更青處飽
看黃本硬黃書翦裁風月聊堪醉拆洗乾坤正要渠賜宅
不應公得免未知此第似林廬

書黃廬陵伯庸詩卷

句法何曾問外人單傳山谷當家春裁來雲錦花無樣倒
瀉珠胎海亦貧汗竹香中翻墨汁芙蓉梢上挂頭巾詩名
官職看雙好向道儒冠不誤身

和賀升卿雲菴升卿嘗上書北闕既歸去歲寄此詩

今乃和以報之

賀子胸中自有山結庵山底更雲間遺才只道今無許此

士如何尚著閑未應萬言直杯水向來九虎守天關莫嫌
久不還詩債詩債從來隔歲還

贈羅椿下第歸永豐

梅苔香中踏雪來杏花影裏帶春回明朝解纜還千里此
日看花更一杯誰道文章大驚俗何緣場屋不遺才南溪
鷗鷺如相問為說春吟費麝煤

楊伯子以其尊人誠齋南海集為贈以詩奉酬

陳傅良

得與門牆最不遲白頭方誦嶺南詩文從嘉祐今三變人
在廬陵此一時細數儒先能幾見獨憐歲晚欲何之瀟湘
直下長江去得望蓬萊却更疑

送周子充左史奉祠歸廬陵

范成大

黃鵠飄然下九闕江船載月客俱還名高豈是孤臣願身
退聊開壯士顏益當年真旦暮露巾明日有河山後期
流速都難料相對猶憐鬢未班

改題萬安縣凝祥觀

文天祥

古道松花空翠香風前鬢影照滄浪飛泉半壁潮雲濕啼
鳥滿山春日長須信神仙元有國不知蠻觸是何鄉道人
橫笛招歸鶴坐到斜暉上壁璫

寄題胡叔軫香山樓詩

并序

徐鹿卿

鹿卿年二十三時得忠簡公斥和議書讀之悚然
起敬持姓名質於長上剛曰此廬陵澹菴先生也
忠節為南渡冠因盡告以公生平出處之詳鹿卿
服膺至今嘉定間分教橫浦乃獲敬讀公詩文而

觀其遺墨未幾公之孫叔軫榮赴經從遂得瞻識
故家典型宛然是似明年北歸款語益密出示香
山樓詩鹿卿載惟胡氏香山之名今烜赫如星日
而白傅洛中之香山已久湮廢可嘆也叔軫伯仲
方有大名於時必將成忠簡之志使洛都復入職
方而兩香山與冠霞同垂不朽可也

笑問香山似舊耶風流宛是更詞華由江距洛路千驛諸公

詩多引匡廬香以宋繼唐詩一家今日重簷窺斗柄向來

遺址面湖沙莫忘先世規恢業羸取芳名並冠霞忠簡樓名

自青原回訪敏叔幾不相遇 姚鏞

曉汲山泉洗硯回要看奇石立蒼苔騎驢應為尋詩出放

鶴還知有客來一井清寒宜茗飲千林黃落獨梅開他時

老圃如能學只乞山中橘本栽

壽永豐劉桂林翁百一歲二首 宋本誠

閱遍滄溟東逝波坊門交午鬱嵯峨七磯老子聯芳久皇

慶君王賜帛多未肯蹒跚策鳩杖可能矍鑠臥鷄窠漢家

德化今成就老桂吹香鼓缶歌

百年瞬目事如雲曾向干戈脫此身過客要聽前代語元

孫同作太平人秋風孤鴈消沈盡塵世飛蚊起滅頻宴雅

堂中他日到卻應黃髮羨青春

劉桂林翁百一歲時手寫詩寄豫章熊朋來因次其韻 僕吾朝

銅狄摩挲遠出關高名清節足廉頑靈椿相望八千歲老

驥長辭十二閑海月飛翰登嶠上天風吹夢落人間絳翁

甲子誰能紀自有金丹為駐顏

九日同蕭煥有兄弟蕭安國陳誠伯彭天玉華明胡履平涂率修兄弟泛舟觀橋吉塘飲酒橋菴順流而

下登西臺寺神岡山復飲山亭觀先朝所賜廟神劉

誥封及晚泛月而歸和煥有韻

斜日千峰生纈斑憑高飲酒未知還百年寒暑朱顏變萬

古興亡白鳥閒野叟豈知酬令節是日耕夫極多高人從昔愛名

山回舟月色寒如水共指城樓杏靄間

吉安道中

薩都刺

西風吹鴈不或行萬里孤舟下夕陽度峽冷風敲客帽捲

簾涼月落琴牀上湖水滿鷗偏樂花柳春深馬正忙又看

青原山色好故鄉歸計喜相將

南省戰船至吉安喜見官歷

郭鈺

干戈阻絕歲時遷幾向空山下月圓仍覩帝堯頌玉歷兼

聞楊僕將樓船旌旗日月臨西楚帶礪山河拱北燕賴有

忠良扶社稷願聞籌策早安邊

白鷺洲晚泊呈天隱兄山長兼柬曹居真

白鷺洲前春水寬素王宮殿壓驚湍風飄墜瓦鴛鴦冷雨

暗疎篁翡翠寒維翰未能穿鐵硯叔孫先已改儒冠淒涼

講席君仍在晚歲冰霜獨立難

偕猶溪諸公遊青原山謁七祖塢

陳泰

夢裏青原四十年今朝來觀塢中仙傳燈有記貝書在飛

錫無聲霜井圓石壁倚雲僧入定飯鐘縈樹鵲通禪看碑

忽悟曹溪旨擬向人間息萬緣

題環翠樓

周聞孫

樓前對酒野鶯啼樓上看書曉霧迷萬疊雲山遮不斷四
簷松竹長皆齊青蛇每候神仙過黃鶴能招太白題塵世
不離蓬島外闌干只在斗牛西

元陽洞

李 昶

昔年曾上鳳凰臺今日重攜勝侶來洞口雲深龍睡穩松
梢煙暝鶴飛迴蒙茸翠草山腰合璀璨瓊芝石罅開千載
何人傳相業夜深凝睇望三台

鳳凰臺
在洞左

送劉竹簡歸廬陵

仇 遠

驛路梅花漠漠寒絨衫絮帽出長安懸知客久歸心切自

覺交深別語難春入西江隨馬去山留殘雪待人看青原
白鷺如相問十載湖濱只釣竿

秋日登城

周霆震

山壓孤城草樹荒西風塵起獨彷徨蕭條遺構重燒毀
憔悴餘民半殺傷驛傳共疑星使杳角聲空引鴈愁長書生
往往談經濟攬轡澄清合有方

城陷

黃塵赤日陷城池又到冰霜歲晏時列寨守江兵夜戒揚
旗出郭寇朝馳就梁誤落荒田鴈啄肉空肥野樹鳴諸將
從容依老守提書但奏莫令遲

梁侯守郡
惡聞兵敗

登城

世祖艱難德澤深
風悲城郭怕登臨
九朝天下俄川決
七載江南竟陸沈
馬首空傳當日價
雞聲不到暮年心
兩經門外青青草
過客魂消淚滿襟

中秋城西感興

玉宇瓊樓三萬里
乘槎無路匪仙才
塵揚海內衣冠盡
鴈斷雲邊鼓角哀
天意未知何日定
月華空似昔年來
故山老桂無消息
紅蓼花高滿路門

寇來自北見城中蕭然散入村落

斷鴈雲低欲度遲
鵲巢何許寄南枝
寇兵已厭空城住
官馬猶從間道馳
萬骨白邊寒月夜
孤煙青處夕陽時
經年北道無消息
望眼頻穿淚暗垂

全參政九日宴僚佐城西神岡泰謀萬德躬賦詩五

首用韻寓情

畫省凝香被羽林
賞心寧許二毛侵
閭閻側聽歌謠起
父老爭看祭戟臨
霜露黃花留歲晏
江湖白鴈待秋深
宴闌歸騎營門夕
涼月紛紛落醉襟

能賦登高幕府親
深秋過雨絕飛塵
山城驛路黃柑富
水寨人家白粲新
歌舞多非前日境
交遊半是異鄉人
通商近喜官鹽集
不比西都巧算緡

如雲冠蓋此高攀
千載龍山季孟間
犀筋駝峰傳翠釜
銀罌春色照蒼灣
歌姬擁醉翻腔誤
才士爭先覓句艱
祇有相如欣授簡
興來無物不相關

蘭臺無分珮珊珊斷壠平岡自往還避地亂來猶有酒放
懷高處不須山叅差紅樹西風外明滅青煙暮
遠尋方外友却隨紫氣出函關

會向凌波賦襪塵絕交近日愧錢神百年撫事皆陳迹四
海知心幾故人借衣冠違世濁天留黃菊貧秋貧偶尋
五柳先生傳自覺年來懶是真

述懷

子月中旬以後兩軍交作羣寇合攻大坑荆山小
水逆黨出城南三十里立砦廿四日破白石下塘
廿五日破吾里吾與次兒長孫寓歷村下牢是日
省都事吳軍已到郡廿六日走度嶺者相屬如繩
過平猶不得家中消息心甚憂薄晚長兒來乃知
廿五日四更初寇掩出吾里兒曹隨眾走厚富向
晚寇退渡江趨王屯暮祇南阜李氏已空室矣廿
六日早中宵蓐食行至高臺嶺巔但見連延朱村

大坑寇火千炬雪凍道滑婦人稚子僵仆不能進
扶挈過大湖嶺出章坑天已晚長友母子無托與
偕來闔門不自意全遂
撥下半依陳氏暫住

風雪爐存半死灰每聽人語輒驚猜眼穿屢揖親知問愁
極忽傳兒子來足繭荒墟煙慘澹魂飛間道石崔嵬經過
且勿談辛苦闔室無虞已幸哉

書所見

正月十八夜全參政軍中告變縛致都事哈刺台
小鎮撫阿思蘭不花萬戶張定住將戮之十九日
昧爽其麾下擁眾扼全舟脇取二人入城閉關縱
兵大掠全由此失勢四月二十七日吳員外部將
明塔普台潛蓄異志忌同列林伯顏武端梟勇挾
詐殺之誣以謀逆吳不能制又叅政軍令喪馬一
疋償白金一百兩
是蓄不戰之馬也

白金戰馬廐中屯部伍酣歌徹曉昏牙帳黑風梟突起營

明白晝虎相吞史徒富躡官曹位厮養威聯士族婚天下
紛紛寧有此我軍成敗不須論

題歐陽文忠公祠

虞集

知公難遇已當年况復瀧岡士世汗金石舊文藏劫火丹
青遺廟祀鄉賢終身未必慚韓愈作者誰將繼馬遷鳴鳥
不聞驚歲晏長淮清潁一茫然

武功山

釋無詰

漢家帝子闢仙居勾漏山川較不如海竇中通王癸水峰
壇上直斗牛墟吠雲犬去留丹鼎行兩龍歸化白魚聞有
神人飄羽翰凌風手把玉芙蓉

吉安府志卷五十一終

吉安府志卷五十二

藝文志

詩徵

七言律詩 五七
言截句 賦

七言律詩

秋日廬陵曲山蕭壽春過林居賦別

明 劉崧

秋露滿園桑葉飛遠煩江上聞柴扉青山古道獨行晚白
髮故人相見稀細雨高原禾黍熟斜陽疎樹橘橙肥殘年
甚欲留君住何事驪駒只賦歸

題浪川洞

一洞深連三十里兩崖高聳百千峯溪流交路爭穿草日
色歸林半隱松野碓春泉秋雨急土窰煉石晚煙濃雲深

不計平畬路月落時聞資福鐘

次龍子高屏山之作

賀守約

早年名價動京畿此日修閒訪翠微
門對山城青柳合天迎沙渚白鷗飛
晉朝丹竈殘煙在漢代銅山昨夢非
笑指蓬萊幾清淺空憐芳草弄晴暉

秋日同子啟弟登武山盤桓遊歷竟日乃反

王沂

一片名山四面青昔年傳此著仙靈
北巖雲作西巖雨下界人攀上界星
虎嘯中峯誰振錫龍眠深洞不聞經
興闢一憩西霞館氣與陶皮接杳冥

題蕭氏蘭桂山 拗體

故人讀書蘭桂林開軒襲芳雲滿襟
有時邀月歌白苧盡日臨風弦素琴
小山青詞自能賦空谷同心誰賞音
昔賢異書為藏貯早晚客星思見臨

遊武山次韻 拗體

梁蘭

武姆樓閣山之巔數家茅屋依山前
棲巖白雲晴冉冉繞林碧篠寒娟娟
仙子索詩請題壁樵叟煮茶呼飲泉
憑高騁望極幽賞使君佳句令人傳

讀宋文丞相傳

鄒誨

世道崎嶇國步難擎天一柱屹狂瀾
風中勁草凌秋氣雪裏孤松傲歲寒
蘇武南歸雙鬢白張巡西拜寸心丹
平生忠節垂青史千載教人掩淚看

訪武功葛仙壇

烏斯道

長憶仙人葛稚川遠尋勾漏問丹泉煙霞不厭久爲合鷄
犬誰知併化仙細水洞中流白乳高峰天際削青蓮憐予
作縣終何事過此題詩意惘然

螺岡晚照

金幼孜

螺阜蒼蒼紫翠浮夕陽倒影映河流白雲半壁峯前暮黃
葉孤村雨後秋漸聽樵歌歸谷遠恍聞僧磬出巖幽昔時
行處今成夢回首令人憶舊遊

靜修齋

快閣西頭有隱居過簷槐柳共扶疎家饒沃壤尊多酒厨
近澄江饌有魚靜志不求三釜祿閉門長檢一床書市塵

車馬從軫轡止水芳心祇自如

贈翰林侍講余學夔還西昌

禁苑同官三十年忽聞承詔賜歸田玉堂金馬貧如舊流
水閒雲客似仙解組未能忘去國聽鷄無復候朝天今晨
相送情無限潦倒空慚雪滿顛

贈康志高致仕歸廬陵

新頒御敕墨淋漓白首休官願不違歲晏天邊孤鶴遠春
風林下一人歸龍河雪色侵行舫官道梅花照錦衣明日
匡廬重回首鳳城繚繞五雲微

贈永豐劉復謙重修歐陽文忠公祠 曾 匡

歐公祠廟老沙溪遺像巍巍見羽儀事業伊周名宰相文

詩安所志 卷之三 詩徵 三
章韓柳古儒師煙雲樓閣千年住風雨莓苔此日碑多喜
劉郎繼前度經綸有志在扶危

題蕭氏臨清軒

尹昌隆

重構新亭繼往賢朱甍仍瞰綠池邊臨堦倒浸天心月遶
檻潛通谷口泉山色雨後侵玉笋波光晝靜映青編今朝
試倚闌干立佳致依然似昔年

快閣近體一首

徐彥齊

千尺飛甍近碧虛丹青零落百年餘龜龍已剝郎官字金
石猶存太史書湛湛波光含寶鑑遙遙山色展新圖登臨
懷古增吟望撫景題詩愧不如

寄李克勉

周孟簡

別來又是十年餘京國重逢憶故居骨肉猶憐多隔絕田
園荒廢近何如客留翰苑驩無酒家在同江食有魚愁見
離羣天際鴈鄉心遙寄數行書

遊紫雲巖

陳興

紫雲巖在紫雲間古木陰陰白晝閒洞口長春花冉冉巉
崖不雨水潺潺仙翁習靜耽山僻野老忘機覺世艱石上
棋殘天地老幾人大藥駐丹顏

送翰林侍講曾子榮扈從北京

苗衷

五彩雲端寶扇開近臣扈駕出蓬萊自依日月瞻明主世
掌絲綸屬俊才淮水晴光分曙柳嶧山春色帶寒梅懸知
獻賦行宮晚賜得金蓮馬上回

贈張瀧崖足隱

羅倫

五柳先生歸去來陶然獨對菊花杯巢田不識君人面伊
呂徒勞王佐才簑笠每披煙雨去牛羊幾放夕陽回錦袍
公子莫來此門對南山日懶開

謁忠節祠

余學夔

古今人物盛廬陵六七宗風是典型赫赫忠貞垂竹帛雍
雍劍佩炳丹青力扶名教中流柱望聳斯文北斗星謙薄
素心常仰止瓣香清酌拜祠庭

送解正諒故學士大紳之子還吉水

曾鶴齡

舊事淒涼且莫論鄉邦今復見高門承家忍廢先人業到
國優蒙聖主恩子敬百年瓊未失淵明三徑菊猶存始知

前代儒臣盛終有餘波及後昆

泰定觀來鶴亭

劉敷

蒙泉春比元都觀况對芳亭景物幽已報浮邱來白鶴應
看函谷度青牛絳桃萼吐林間徑碧杜香生水畔洲老去
韶華知自惜乘閒今日重淹留

五雲樓邀二林通府

劉玉

五雲樓檻倚晴空暇日攜觴款二公章貢江聲絃管外芙
蓉山色畫圖中十年契濶占星聚千里諮詢擬歲豐能賦
登高漸潦倒凌雲歌罷見飛鴻

永豐劉景惠持吾亡友羅一峯事狀來訪白沙道其
尊翁程鄉宰肅菴願友之意留予館中數日贈之

詩餘
卷三十三
詩餘
五
以詩

陳憲章

儒官秋晚謝遲回
林下齋扉不浪開
顧我敢辭千古迹
故人真爲一峯來
風流相見雷封下
消息遙傳雪浪堆
明發仙舟聞解纜
屋烏情在莫頻催

前王疑塚

在南岡相傳
錢宣惠王墳

蕭端已

何代官家列塚多
瀕江十里幾陂陀
圖經已紀金鷄識
民俗猶傳玉燕窠
輦路年深埋草徑
寢園址廢失蓬科
錢吳尙有遺孫在
不棄松楸守澗阿

九日登巘山奉獻聶太保公兼謝凌明府

宋儀望

絕巘峩峩小徑盤
萬峯迴合見僊壇
雲依虛閣青冥削
地

轉明河白晝寒
躡屐登山陪謝傅
栽花滿縣是潘安
共懽四海爲家日
今夕何辭酌酹難

寄羅念菴

夏言

南國佳人玉作顏
臚傳曾出殿前班
桐皋蓮洞自朝夕
金馬石渠空往還
老我徑虛經濟業
憐君早扣聖賢關
芳洲桂樹連蜺碧
歲晚東來好共攀

送劉肅庵別駕之雷陽

陳獻章

安得大風來掃之
滿船戈甲送君時
斯民若道無三代
孔轍何須更九夷
暝入滄溟知島嶼
春隨紅雨別山籬
白頭別駕雷陽去
何處明朝更有詩

寄題一峯草亭

一峯謝病去官門人何君喬壽割田百畝以供伏臘予聞而深喜賦此

青山卜築壯吾曹
白首悲歡定此交
弟子何心供伏臘
先生多病托衡茅
雲霄萬里孤飛翼
宇宙千年一繫匏
江上獨歸音信少
天涯相憶夢魂勞

洛陽峽

尹爽

千崖峻削起崇墉
一水中迴路僅通
峽東曉嵐迷錦繡
山含晴旭曷芙蓉
乾坤異境元藏世
塵土吾生浪寄蹤
安得誅茅開數舍
一編長此臥雲松

遊青原山

羅欽順

朝訪名山露未晞
翠嵐浮動欲侵衣
坡頭路轉松陰合
隴上人閒豆莢肥
泉響遙聞心已淨
寺門初到夢先飛
從來

賸有煙霞癖
爭奈行藏與願違

賀歐陽石江少宰移居雲亭之西舉

六一文章宛在茲
兩朝名實四方知
道慚枉尺歸田早
謀重貽孫築室遲
地敞直憑溪作界
堂高仍以德為基
只疑赤子顛連日
不是東山偃息時

考正劉忠愍公諱日

公為王振所害事秘不傳先行人如墟記公以六月二十一日卒於獄二十三日其家始得訃於是連三日為諱日蓋疑之云

羅洪先

身亡底事論遲速
疑信元關筆削權
華袞有褒須繫日
貂璫何力敢移天
魯公生氣誰云死
石顯陰謀自合傳
多少白頭還牖下
姓名能得幾人憐

登雙江公凌空閣

拔空披翠入牕開誰向青霄起玉臺舊客遠從雲外入主人新自日邊回憑軒獨坐千峯上勵地高歌萬壑哀來往便當乘鶴背愛君身已出塵埃

奉陪雙江先生訪舊石屋

僻居春日苦離憂獲奉巾車訪昔遊共出羊腸窮遠道幾看魚泳坐臨流孤雲無繫身常健一劍相攜志已酬不遇辭榮甘混跡豈應清論在林邱

赴雙江公約入安成

十年農圃未知貧漫惜花飛淚濺巾一宿巖崖逢道侶倍憐章句悞儒身閣中曉雪千峯靜洞裏寒梅一夜新報道春江發春賞前汀可有問津人

題歐陽監丞祠

使丞出塞無歸日古鎮新祠多烈風尺寸地皆先世有存亡身與列城同亦知北虜重來急且表南朝一介雄生氣九京那可作亂蟬高樹夕陽中

太保司馬毛公歸田投贈

三邊百粵仰威名獨握兵符十二營頻賜寵衣分御府密投勝算中皇情身閒不俟成功後道直終令眾論平暫使山林增氣色白雲還待慰蒼生

舟至螺川聞復遣二校追回弟元以家屬代解即買

舟星馳就繫用韻示兒姪輩 劉魁

廿載君恩天地大百年身世羽毛輕孤臣底事勞明主萬

里何心保此生老眼不揮兒女淚丈夫自有別離情丁寧
囑付無他語莫負廬陵忠義名

秋日偕諸友集梅田洞

尹臺

錦林遙筵碧雲稠石戶高開少昊秋偶共稷亭談白馬貪
依函谷駐青牛中天秘石仙人隱異代真符使者求老幸
歌遊長此地不知塵世隔丹邱

題石蓮洞留別羅宮贊達夫

何年片石鑿荒萊翠擁瑤蓮萬葉開山曲故宜藏霧雨巖
虛莫恐動風雷林間羽客緇經罷寺外齋僧乞食回相伴
不妨成久臥天書鶴隴未言催

送聶又蔚先生出詔獄南歸

帝闕浮雲萬里開春風繁雪霽燕臺孤臣敢為微身計聖
主終憐天下才夏勝傳經應自信范滂攬轡欲誰裁古來
麟鳳無羈繼寄語虞人莫浪猜

惜陰會

陳嘉謨

郡西能仁寺唐吉州司戶杜審言詩社也降慶丁卯能仁再舉惜陰會予偕鳳閣子九日入山中迎周羅山劉見川二先生主席郡邑縉紳仕而歸者暨國學兩岸之彦先後來會安成兩峰先師劉師泉先生時一枉教焉久之先輩彭謝聚首者益落落萬歷庚辰秋九月議置會田合饌茲會復振鳳間子賦詩志喜予感而和之

舊遊早已悲遲暮重到那堪憶歲年聚散幾陪蓮社侶招
邀仍是菊花天獨憐華髮承先進忍向多歧待後鞭此日
情知難再得一談忘食一潸然

題永和歐陽監丞公祠

曾同亨

監丞祠廟接江城古木寒雲入望平一死疆場酬素志千秋俎豆有餘榮臨焚罵賊言何壯弔古懷人淚欲傾闕典未增忠節祀揮毫題罷倍含情

次登雪浪閣韻

閣上寒雲冉冉霏江頭木葉傍人飛高秋倚檻間砧杵落月停舟坐釣磯登賞有懷工作賦追陪無計慰搗衣清風明月成孤賞負却山中蕨筍肥

九日讌集武功山次尹明府韻

甘雨

窈窕仙林轉石扉登臨此日澹忘歸當筵詎可無黃菊送酒何妨有白衣秋老蒹葭傳浙瀝晚晴雲物動依微佳辰

茂宰招幽賞好計山中共駐驂

題鳳洲草堂效吳體

桑悅

江水四面圍高邱草堂結在邱山頭頻經春雨打不漏苦奈秋風吹未休枕邊驚聞櫓聲過檻外俯看雲影浮我約吳郎來借住并吞沙草占溪鷗

楊文貞祠

歐陽雲

蓋代勳名在鳳池搗謙常似布衣時魏公白日青天鑒司馬兒童走卒知多士盡憑金作範九重安用卜稽疑文山寂寞文忠俎豆非公更屬誰

東華觀

劉隆

溪外三山莫浪誇塵寰勝地有東華元關夜湧金潭月紫

閣朝飛玉洞霞水際雲根蹲虎豹壁間仙篆動龍蛇滿庭
香雪東風細吹落茶蘼一樹花

登南臺梵慧寺

陳鼎

重樓疊閣倚巉巖孤寺疑懸碧落間拄杖迴臨塵外境捲
簾仍對畫中山休憐佛說恒河苦且共僧留竟日間却笑
未能離住相夕陽西下不知還

送鄒南皋請告南還

張位

何事陳情不可留樹萱翻切倚門憂人看千仞雲端鳳跡
狎五湖波上鷗葵藿有心終向日煙霞入眼最宜秋南山
北關紛相笑出處時關世道謀

吉州

萬任

城頭高望野雲閒渡口雲歸人未還章貢春濤浮鷺渚廬
陵秋色染螺山舊家柱石殘烽後新市漁樵落照間極目
風帆天際盡斗牛劍氣近鄉關

與劉瀘瀟陳梅和遊書林洞洞最深杳奇蹤怪形不

可勝紀

王德新

幾回攀折入蓬萊碧殿晶光一竇開崖滴瓊漿晴亦雨風
敲石鼓晝常雷泉聲暗與黃龍渡樹色遙騰白鶴來金篋
秘書雲欲護狂歌天外有仙才

與汪靜峰使君遊青原

翠落秋陰山更幽使君匹馬此同遊鐵橋抱月迎仙仗珠
樹飛花結羽樓巖靜猿啼驚露冷潭深龍臥帶煙浮未妨

把酒狂歌發塵世風流易白頭

送青螺郭公予告還豫章

謝三秀

澹煙芳草送征輪自是高堂有老親定省百年蒙聖主安
危萬里仗勞臣陶潛賦就寧因菊張翰歸與不為尊出處
於公關世道還看白髮照麒麟

惶恐灘

劉養晦

疊浪堆山起復沈寒風將雨作晴陰江通吳楚關河遠天
壓東南道路深庾信多才空白首相如有賦致黃金波神
若使煙濤息早晚看花到上林

黃塘巖

石渠流水出天台巖洞玲

戶牖開千古溪山留舊迹百

年題詠屬賢才龍嘘海氣朝為雨雲過巖陰暝作雷風靜

夜深星斗近鼇峰萬疊接蓬萊

武山

巖堯日

秋靜巖深處處仙陶皮蹤跡是何年出雲盡寫千山景遠
樹疎籠萬井煙北斗壇空留屐舄珍珠水潤溼瓊田便疑
駕鶴三神外還擬藏書二酉巔

快閣

陳昌積

快閣東林黃葉稀蘋洲蘋渚更霏微穿波細細漁舟見拂
水深深澤鳥飛搖落豈堪悲宋玉飄零翻自弔劉幾出門
陳跡俱長歎霸壘越臺今是非

五雲臺

陳泌

五柳書堂是也非青樟臺上列成圍生經宋代遺煙莽耻
受秦封掩翠微山色直隨飛鳥度鐘聲遠帶暮帆歸崑川
今古人行處惟有眠鷗穩釣磯

飲讀易臺懷聘君劉瀘瀟

金國柱

讀易人歸冷一臺小龕倚壁坐雲隈瀟寒自不疎游聽石
惟偏能入雅裁老薛動牽樓外雨長松高拂馬頭埃偶來
何意逢佳主飲興旋從邸壑開

告文文山丞相矢志

李邦華

空將腔血灑燕京死事何如成事人帝陋唐元真聖主誰
為伯紀泣孤臣忠良雪涕難分任嬰曰傷心共一身信國
斯文誰領取仁山千載協麟岫

南閣 排律

劉同升

城中勝地惟南閣數日肩輿兩度遊新綠盡舒江上柳寒
沙頻狎檻前鷗棲遲故國難為別悵望封疆始欲愁何處
遣懷需白墮仍聞塘報慮青州邈來二協徵兵弱自昔圖
營未遂謀况是勤王遲寇退誰能籌運釋君憂黯然相對
更無語直欲憑軒涕泗流

族姪女殉難 有序

女永新人適周氏湘陰明府孫女也知寇將至著
衣十數重以線紉之罵賊不已賊斃之

手把重衣密密縫出門罵賊死從容泉臺不怨新婚別廟
祀無慚茂宰封作女曾聞天上謫為雲羞向楚山逢傷心
鬻死驚奇節何必男兒始亢宗

烈女龍氏 有序

茂才士奮之女予同堂外孫也士奮字伯庸負才名使氣女委禽尚幼兩家爭毆父死離婚女稍長每欲為尼母以其幼也徵示改聘之意女曰不能為父死又復有他志女流自賤何至於此母乃自辱乎終不能強剃髮誦經同母家居數年病卒

可嘆鬢眉義未申大讐不報共乾坤惟知父一長為女忍
謂夫存別事人半世不甘聞婦字空門自合拜童真曹娥
江上碑難讀况是幽貞倍苦辛

禾山即景

賀貽孫

閒從竹院禮瞿曇數點螢燈照祖龕花底聲聞鸚鵡憾雨
中跌坐老龍參曾經捏鼻人知痛恰遇點頭石欲談羅漢
歸來僧漸去怪予早唱望江南

武功松

吳雲

尺五天登是武功誰開青玉老芙蓉常看歸鶴橫雲白又
見陽烏洗日紅已在此間出混沌更於何處問鴻濛忽從
飛海瓊仙下一笛高吹萬壑松

螺山石

螺子山中雙石懸西乾東潤各輪年久同天地陰陽正不
似人心彼此偏貞靜豈甘如晉語尊嚴不許到秦鞭莫言
踏老蒼苔古直立時撐蒼昊天

唵溪橋

詩社當年賦幾賢如何名字未曾傳夜懸溪口三更月曉
掛橋腰一帶煙司戶久留風雅韻少陵應有聖賢篇憑誰

又掌騷壇事調鶴飛空奏五絃

石屋用金文敏韻

東陽五里繞孤巒石有波稜壁有瀾陰洞封門愁火入劍
鋒拔地倚天寒麟山對面開蓬徑龜渚牽船試竹竿浮渡
一尊還舊夢真如金谷野同看

武功和白長庚潑墨壁間之韻

我是於今採藥翁依稀風景舊時同洞中葛祖書還在海
上麻姑信已通白鶴峰橫天柱北青龍瀑掛石梁東猶追
當日羣仙醉曾有松花落酒中

安成西里道中望武功山 國朝 羅圻彥

雲峯萬仞倚天開鬱鬱松杉望幾回鸞鶴銜花歸石洞煙

霞散彩落仙臺只因鷄肋勞塵土空羨牛衣臥草萊今夜
願從清夢裏葛翁把袂破蒼苔

春日詣學宮時方議修造同王謹山唐上若感賦

風吹草帶正芊芊瀟水迴環綠菊邊禹貢盡宗新玉帛虞
庠忍付舊烽煙文章欲壯宮牆望制度須從禮樂先自愧
鳴琴逢勝友愛人學道兩茫然

泰和謁楊文貞祠 程可則

三楊自昔規模遠道氣如公更可師不見諸軍平漢日獨
存孤趙論功時羣言幾奪天王眷片語能全叔父私今日
豐碑猶在眼更無蘋藻薦荒墀

歲杪歸臨江聞吉州諸子仍集鷺洲講業欣然成詠

施閏章

寒江落照片帆分別緒千重鷺渚雲實恐殘年虛荏苒
憐諸子共慙鯢魚龍澤畔章逢集雨雪聲中絃誦聞
心期良不改百年何處是離羣

同愚山使君登快閣

高詠

聞說涪翁作吏時風流高閣坐題詩蒼苔此日來孤客碧
草何年沒舊祠雨過江邨春樹出煙含沙渚暮帆遲憑欄
一望銷愁處四面青山對酒卮

曾孝子聖玉廬母墓就訪有贈

劉自越

尋父當年志已違父遠遊孝子徧尋過於橫浦泣請弗歸後莫知所之萱花零落竟
何依愁橫武姥雲常結淚溼華峯雨載飛引罪居然囚土

室薦馨儼若奉慈幃長年孺慕情何極黑鬢星星帶雪歸

文江卽事

李元鼎

小園叢桂隨時發故里黃花到眼稀蘆渚風生潮已上霜
江秋老鴈初歸三軍嶺外猶裹甲八月天寒未授衣輸輓
年來民力竭詔書曾否及巖扉

送張簣山學士歸廬陵二首

王士禎

海內人知諫獵名伏蒲今復記乾清一時對仗丹心苦
幾夕憂時白髮生天下文章唯永叔廬陵人物有邦衡曲
江風度他年憶金鑑還應答聖明

迴首觚稜別紫宸孤舟遙下富川濱誰令江外漁樵侶爭
識先皇倚從臣上殿似聞辛慶忌行吟休擬楚靈均千秋

公議存青史應為朝廷惜此人

梅田洞二首

黎士宏

不附羣峰自立尊桃花紅近宛成村
擲天就日無多路放月歸雲各有門
父老時從徵異事神仙終未淡名根
桑田換盡渾彈指小洞殘棋局尚存
居然舊稿畫雲林斜著苔痕蘸墨深
小置斷橋安樹底稍添平屋補巖陰
石當奇盡扶筇看洞愛幽多秉燭尋
徙倚空天風御冷不教衣袂點塵侵

登鷲山絕頂

陳方中

纔說登臨便是仙扶藜屈曲到山巔
逍遙絳闕無多路睥睨紅塵幾點煙
萬卷書中探豹略三生石上試龍泉
相將砥柱雲霄外撐起東南半壁天

梅陂

歐陽宗衡

穿林撥莽度長堤蹙蹙登臨杖指西
天半何人開鳥道蘆中有客洗漁磯
澄潭石點疑星落遠浦霞光連鷺低
欲會傳心無隱處樵香滿院正希微

忠義潭

龍聯芳

高樹蟬聲正夕陽嘉禾城下水如湯
殘疆瓦裂戰無地八族心同死有鄉
正氣幾人留宇宙匹夫亦自識綱常
卽今說着劉槃事鬼語啾啾入夜長

龍門

龍益舜

銀漢分聲天上來奔崖觸石怒喧厓
紫虬夜噴千村雨鐵

甲晴生萬壑雷故相臺前空落照千僧釜在半蒼苔捫蘿
幕得平原字一幅鶯溪百折廻

秋日登永新城五首

錄三

江世琳

阿青風高萬戶寒丹霞碧洞隱仙壇磚間血不磨炎宋潭
底魂猶叱逆槃鳴犢伏籬秋草短野禽爭樹夕陽殘旛竿
空有高僧度嘆息長川去渺漫

江光激灑抱廻峰峰頂明霞紫翠濃嶺樹盡搖金瑣碎秋
山都化玉芙蓉晴雷晝靜懸泉斷搗石聲乾落葉封古渡
日斜人跡少巖花香滿石蘭叢

七十一峯削碧天八花臺上月娟娟勤王信國無疎戚相
業文安稱後先水落魚龍歸大壑秋高鶴鶴滿前川荒原

燎火年年發白草青燐泣暮煙

忠義潭

曠雲

炎火銷錢宋祚移六宮銜壁亦堪悲匡山波浪無遺塊柴
市風沙有義旗半夜孤城弛鎖鑰同時八姓葬江湄鄉人
立廟袍溪上萬古芳名泐鼎彝

自廬陵復之永新

李紱

舟楫頻年廬永間冥冥孤壑走重山千羣黑散牂羊石百
丈聲哀畫角灘來往日車翻木末西南風壤接苗蠻悲歡
半為他人轉畏向寒流照旅顏

梅田洞次龍孝廉因菴韻

古洞荒寒日月閒空留門徑與八閭年深鐘乳多成石日

暮歸雲併作山絕壑千穿通地肺透空孤竇想天顏定知
中有神仙宅僊從無勞勸早還

登青原絕嶺同何方門

絕嶺煙開三月春青原極目遠無垠龍蛇泉出千峯亂菜
麥田分萬井勻呼吸定知通帝座蒼黃未擬別家人兩生
狂欲摩崖石為記嵩遊第一巡

前後遊三華山詩 有序

梁 機

余兒時居山之東村出入嬉遊與此山為芳隣者
七年聞故老言唐羅真人飛昇於此時雖幼即心
焉慕之每昏旦雲烘泉響或行樵遙坐樹根山靜
人稀時聞風鐸振動林木輒張望咨嗟若不能喻
諸懷按仙鑑真人諱公遠幼年得道與張先生果
葉法師法善俱事元宗朝甚見尊禮鑿與西幸豫
寄當歸真人仙跡猶顯著其來山飛昇雖出傳聞
然丹臺遺跡宛然半山廟殿石像真人儀甚少歲

時祈請遍遠近更歷數祀已古矣知非鑿空也余
自徙居多四方之遊故山蹤跡未數數然戊戌凡
一至焉題二長句志感而去已而更涉仕宦又十
餘年今癸丑之二月始復一至止宿山下憩林精
舍流連旬餘同遊有兄逸才兒子燮亦隨侍焉取
玩舊句因復次韻以志余慕真之志於此山為極
爾 不忘

戊戌遊三華故山

靈山銀榜變青霄盡日巖扉絳節飄風雨無期谷神靜煙
霞有路羽人朝源頭溪水分明曲樹頂星河呼吸遙我是
三清舊童子真人天際許還招
山花故故向秋開廿載山人始一回乍觀渾忘青嶂面初
行猶滑碧除苔世間棋局難中罷磯上沙鷗莫浪猜留著
煙蘿返初服終期採藥此巖隈

癸丑重遊和前韻

山勢依然轟紫霄，閒身亦免斷蓬飄。姓名已落三階籍，猿鳥猶嗤五鼓朝。丹竈有形煙寂寂，碧天無路夢遙遙。仙源詎隔人間世，長待溪頭漁父招。

林中玉宇戶猶開，臺上真人去不回。殷地雷聲還送雨，捫崖衣袂任沾苔。多情歲月驚拋擲，至道虛無費指猜。倘許舊鄰稱北面，蓬瀛即在浴潭隈。山下溪流瀆為潭，在丹竈左。傳真人以此水浴丹，故名。

遊梅田洞

李錫

春風滿路送征鞍，草色光浮露未乾。一水分田眸底闊，三山拔地海中看。三山特起，田中各成一洞。巖頭石墜驚天裂，壁上煙凝

怨柳寒

洞中有石柳垂壁

却怪爛柯人不見，殘碁幾著落空盤。

九日吉安試院登樓

金甡

登臨昨歲罷招攜

乙酉重九已訂客登高閣，恩命而止。

堆案今看束筍齊

深屋不須愁帽落，殘牋猶足借糕題。漫勞文字誇千萬

吉安

童試計一萬四千四百餘卷

誰遣磨礱減角圭，好泛萸觴酬暮節。小樓

憑仗作丹梯

佛母墓

廬陵志云傳是定光佛之母

如來舍利涅槃分，佛母生天自有墳。鎖骨幾時留幻相，蘭

盆誰遣薦餘芬。應憐悉達窺家去，長伴摩耶說法聞。不向

尸隄林畔積浮屠，元解報恩勤。

敬題文文山先生遺像家書卷後

畢沅

勤王瓜步出亡時何處攀龍問六師海上陸沈無淨土江
頭嚮道半降旗殺身始定千秋案殘局終難一木支誰似
從容蒙難日一編手集少陵詩

瓜步軍門夜不開間關五嶺陣雲頽中原已換紅羊劫半
壁空謠白鴈來柴市雲旗藏碧血蘭亭石匣瘞沈灰義民
辛苦收遺幣難覓冬青一處栽

聖湖王氣黯然銷廢闕銅駝臥寂寥蟋蟀平章葛嶺月杜
鵬望帝浙江潮死收南渡貞臣局魂藉西臺老友招愧殺
白頭王座主逃名遺老人新朝

空坑兵潰瀨江濱一突真同九鼎淪自有文章留正氣何
嘗聲妓累忠臣黃冠遜世悲無地白刃飛頭畢此身烈血

一腔描不出凜然餘怒尙含瞋

鴈塔先生自號瘦翁姚雪門觀察爲之作傳邑人士

競相傳頌余未之見頃先生郵示二瘦圖即先生與

觀察也系之以詩而不列其傳次韻二章

歐陽柱

二瘦何因入畫圖瘦翁一傳播通都清深江匯文章水

章水吾鄉水名斗峭山形大小孤大孤小孤山名夢得耽詩多和白元之

作繪昔同蘇紛紛詞客欽雙美秘枕其如我獨無

飯山風貌並堪圖一賦歸田一入都時觀察將入都春立雪門欣

兩化月當雁塔插雲孤何妨添我成三友或可徒行訪兩

蘇試問東陽老詩客束腰曾減帶圍無

觀恩江鳳髻遺花

謝卓

山踰鳳輦避煙塵網綴蛛絲信有神
偶插玉釵酬一念遠生琪樹表千春
青蔥自具凌寒質黯默還同失路人
應是帝京歸有日故含微笑向臣鄰

恩江夜見仙燈

仙宮深鎖五雲端劍佩歸來鶴影寒
自有流光時遶座非關分火夜燒丹
散同星斗沈瑤海聚擬珠璣積玉盤
望久更忘蓮漏轉滿庭松竹露漫漫

九日同友人登天心巖

李之轍

憑高已悟此身浮步入天心興倍幽
遠近楓隨秋氣老江村烟共碧雲流
菊翻蝶影迷僧徑風落鴻聲送客愁
誰健

明年總莫問一樽幸對且相留

紫雲崖瀑布

陳文孫

紆迴石徑仰巖從百尺懸泉濺碧空
草際浮光垂匹練巖端飛雨落長虹
望窮澗底流花影劃破松陰織霧濛
更欲尋源峯頂上紫雲深處閉龍宮

石城洞懷劉聘君

陳繼鎮

古洞幽奇徑未荒一壇曾擁鄭公鄉
祇今露涇濂溪草無復藜燃太乙光
春蚓自斜留碣古芳畦資潤引泉香
獨攜琴鶴清如許非為看雲踞石床

琴亭

孔興源

記攜徽軫過汾亭落落而今散曉星
一曲韻沈千澗碧半

椽環抱數峯青檻前翔鶴嗥清露雲外飛鴻入窈冥為湖
風流遺蹟古絲桐嗣響樹官型

蓮花橋

綠陰深處跨飛虹人在芙蓉冉冉中萬戶烟寒開水國一
鞭春暖駐花驄岸圍壺嶠津梁合亭枕琴臺畫浦通司馬
留題碑版在蓮峯匝匝景光風

洗墨池

搗就蘭亭墨縱橫臨池烏玦太分明香流碧鬣松滋膩潤
浥紅絲水氣清摘藻已堪傳鳳閣化龍無意戀羊城開元
亦有偷糜賜回首書臺冷一泓

仙人杏

杏花紅處罨春山仙監當年此門關洞外無塵迷紫豔壺
中有藥駐朱顏澤留匡嶽三千樹翠冷邗江十二鬟爭是
一壇時雨足涵林古幹尚斑斑

與五峰書院訂期校課兼柬杜西田明府王竹素山

長

周 壘

坐壓雙溪面五峰水山襟帶勢重重有諸君子斯為盛屬
我泉疆秀所鍾士以英多稱磊落文歸大雅得春容慚予
廿載鄉關別為掃西齋此溯從

思鄉石

梁 玉

片石臨江竇乳流屹然何事起離憂疑從蓬島飛來遠偏
向河梁悵別愁擣練尚思龍塞夜支機還憶鵲橋秋何當

歸去如珠返巔屬神鼇頂上遊
五言截句

席帽峯

宋 劉敏求

席帽何人製天然樣更新舉頭霄漢近不解困風塵

虎鼻峰

平巘轟崇墉中天紫翠里曾因望江水上到最高峯

竹園書屋

胡安國

四壁無圖畫推窗盡簡書真吾何所寄深處樂如如

筆峰

楊萬里

筆峰插霄漢雲氣蘸鋒芒時時同揮灑散作甘露香

鑑泉

捋鬚俯寒光可鑑不可唾一泓湛虛明中有白雲過

金牛供佛圖

元 吳澄

憐汝山中苦殷勤飯一盂阿誰知飯味汝意亦憐渠

南巖石

明 劉崧

濩落歌空日嵌巖偃半匏不愁山雨溼自有白雲交

送西昌歐陽永清韶州訓導

解 縉

獻策黃金闕之官嶺外州送君離恨少江水共悠悠

吉安

李東陽

山勢西來斷江流北去平萬家深樹裏聞是吉州城

登雪浪閣瞻念菴先生祠

張 位

閣外浪如雪座中人似仙高風不可覩山水尚依然

武姥岡

蕭執

高霄分處遠白下望中尊仙姥何年化清秋聞嘯猿

過谷亭

楊士奇

明月轉橋竿露下孤蓬溼欲繫谷亭舟沙頭風正急

高家井

李時勉

虛直天光入清圓地脈通素耽君子操資爾滌塵胸

山居

劉球

水抱孤村遠山通一徑斜不知深樹裏還住幾人家

王岡弔古

王仲錦

王岡環帶水花落舊名家試問前朝事槐庭宿暮鴉

禾山嘉禾

郭祥正

英英禾山禾乃是鳳凰食鳳凰殊未來禾生亦何益

南臺

龍玉泉

秋松落層陰秋水蕩寒碧一曲紫瑤琴空山暮天寂

金橋菴

賀善來

曲曲迴環渡尋源到梵天誰云流水去長在寺門前

石廊洞題壁

賀覺

洞竅何年闢危橋共鳥尋幽靈通眾響萬古石廊心

梅田洞

郭萬里

半著殘棋在神仙何處歸此中長不夏冷翠撲人衣

玉峽

龍大經

峽口泉聲細中間小有天奇花相對出開闢是何年

題尚山斷雲禪師靜室

李斗

峯影人柴門泉聲通古樹但聞花發香不見開花處

遊虎潭

陸若濟

崖懸怯吾顧潭空沁我心匪斯涉游趣敬慎識官箴

盤龍山洞藤

甘相明

採芝復採芝深山更深處青壁掛孤藤仙人從此去

江行經皂口

國朝 施閏章

將入雙江路雲迷皂口西昨宵愁不寐恰有鷓鴣啼

十八灘絕句

并序

查慎行

按志自贛縣至萬安中有三百灘孟襄陽所謂贛石三百里是也然陳書云贛水本二十四灘武帝發虔州水暴漲高數丈三百里巨石皆沒止存十八灘耳世稱十八灘者當本此明嘉靖朝湛甘泉

自南司馬告歸過此作十八灘今得詩亦如之否取灘名中一字為韻非云相襲亦勞者自言其情而已

習坎險在前何人不惶恐到此退已難應思急流勇

惶恐

巨石浮牛背亭亭鷺足翹入鷗羣不亂愛汝好風標

標神

連日遇石尤湖洄良苦辛滔滔天下是不問久知津

綿津

舟人買紙錢例拜灘頭廟來朝風順逆今夕誰能料

大料

後灘接前灘川脈互縈繞人間爪牙毒為害長在小

小料

問言洵有神受命若酬酢借取方便風泥行免郭索

舞索

侵曉上曉灘我睡不覺曉向來坐有心憂患亦不少

曉灘

萬里黃河水崑崙乃發源贛江源漸近應窺小崑崙

崑崙

虔吉此分疆灘聲一倍長人家盡柴步墟落半漁梁

梁灘

雪少偏多雨朝昏水氣腥青洲洲畔草臘月已青青
青洲
 礪相摩盪驚濤盡日喧直同雷奮地不獨雨翻盆
銅盆
 大波深如淵小波淺為瀨安得并州刀剪此青羅帶
落瀨
 長年生狎水豈有不龜藥幸自少層冰可憐多赤脚
狗脚
 莊生工寓言率以小況大必若魏王壺人間能幾箇
大壺
 失勢落江湖中流賴一壺千金奚翅直人有不賞軀
小壺
 劍戟礪鋒鋌森森兩旁吐狂瀾障不得為欠中流柱
天柱
 石欲截江斷江流奮怒前來如弓挽強去若箭釋弦
橫弦
 用盡灘師力今朝過驚灘我無牛酒犒愧爾報平安
驚灘

青原集句

彭良勳

待得重陽日孟浩門尋七祖禪杜甫蕭然登十地太宗秋

色淨居天王維

瀟灑竹間亭吳警相逢成一笑王維遊望亦徘徊趙冬巖

花斂餘照上官儀

興賢渡

孔衍晟

縹緲雲章閣芳菲白鷺洲賢關從此渡先上木蘭舟

鵝公嶺

李之轍

拂露上鵝嶺臨風天欲低茶烟繞一息看日已朝西

讀書臺

劉世衢

鬱鬱石臺荒幽尋一披草獨有讀書人依然名不老

洗墨池

玉洲起飛龍紫生墨池霧我來山上遊就寫遊山句

龍頭山

孔興源

爾養蒼髯久昂霄不受籠一拳神變化吟向碧濤中

仙人杏

李其昌

仙翁遺手植洞口點殘霞可似涵林種人間老歲華

掛榜山

獨對文峯嶺高張掛榜山秀靈參碧落直破蕊珠關

北斗嶺

高挹天關壯應推喉舌司泰山齊北斗千古仰昌黎

石鼓山

夙仰周宣蹟今聞石鼓名何人為搏拊應及眾山鳴

六言截句附

永豐道中宿安溪鄧東園家

明 羅洪先

暮雨柴門客到春來耒耜人歸夜深不談鹿夢倦來且臥牛衣

門外竹林啼鳥窻前流水飛花沮溺老來忘世希夷眠處為家

西樓閑立

隔岸夕帆遠浦高陂春草閒牛林外斷煙一縷幽人正倚西樓

洞中

日永洞中無事泉來石下松邊不辨人閒何事薰風時醒閒眠

七言截句

送梁郎中赴吉州

唐 劉長卿

渺渺雲山去幾重
依依獨聽廣陵鐘
明朝借問南來客
五馬雙旌何處逢

題顏詡庭園

南唐 孟賓于

園林蕭爽閒來久
欲訪因循二十秋
此日開襟吟不盡
碧山重疊水長流

觀永叔集古錄

宋 梅堯臣

古碑手集一千卷
河北關西得最多
莫怕他時費人力
他時自有錦蒙馳

觀永叔畫真

良金美玉不可畫
可畫惟應色與形
除却堅明盡非相
世間何必重丹青

蕭子雲宅

黃庭堅

郁木坑頭春鳥呼
雲迷帝子往時居
風流掃地無尋處
只有寒藤學草書

侯尉家聽琵琶

舫齋蒼竹雨聲中
一曲琵琶酒一鍾
恰似潯陽江上聽
只有明月與丹楓

題吉水南華寺

劉 夙

紫翠浮浮奪曉昏
生涯谷汲與松焚
客塵一點自應少
終日到門惟白雲

吉州凌波亭月夜

王庭珪

螺浦東邊雪浪生
峰頭月出半輪明
扁舟欲載銀蟾去
一聽蒼龍水底鳴

桃花澗

破臘山桃已盛開
飛花無數點青苔
莫教流出前溪去
引得漁舟入洞來

題永興觀

胡銓

連雲宿麥團碧浪
綴草落花成錦窠
我來欲覓種桃者
獵空存庭下莎

萬安韋邦彥字俊臣攜王民瞻楊廷秀謝昌國絕句

相過次韻勉之

周必大

瀘谿筆力透天心
楊令文追正始音
更讀池塘惠連句
識君何待接清襟

後學爭歆雨後巾
前賢久澤霧中文
韋郎勉力追三傑
他日人還傲五雲

乙卯楊廷秀訪平園卽事

乘興不回安道舟
銷憂同倚仲宣樓
莫嫌四面酸風射
猶勝三場瀋汗流

紹興庚午某與安成劉逢辰秋闈同薦逢辰四子伯

德禮淳熙甲午解魁登第今宰臨川仲德仁拔癸

卯解叔德恭負雋聲季德性紹興乙卯復冠鄉舉

出示當時小錄手澤在焉爲題二小詩於後

丁年韋布逐槐忙結綬王畿四紀強已把衣冠挂神武夢
回猶未熟黃粱

鹿鳴舊籍晚重看翰墨場中興久闌同榜諸郎皆舉首老
夫安得不衰殘

慶元戊午重九天氣晴和待王七兄提舉監丞早集
清都臺午飯讀書臺晚集神岡西臺皆古迹也戲

成小詩

年豐私氣借春來兩足黃花趁節開要識重陽真富貴弟
兄一日歷三臺原注陸士龍與兄書云一日上三臺曹公
藏石墨十萬斤又蔡邕以待御史轉治書
侍御史遷尚書三
日之間周歷三臺

賀升卿著春秋會正論屢督跋戲作

三傳名家各是非聖經原自許傳疑遲遲著語君知否游
夏猶難措一詞

安福歐陽紹之奉議桃花石

蟠桃一綻歲三千仙傳荒唐未必然何似此花留巧石有
開無落更長年

武陵溪畔古桃源洞台空勞託往還晉代漁郎心不轉隨
花化石在人間

太和宰趙嘉言造大舟付諸渡又停鄉村酒坊代輸
其課繪二圖各題小詩

爭渡行人簇水邊水中鮫鱗快垂涎從今何待跛男子共
載誰非利涉川

攤酒催錢吏打門那堪嫁娶盡朱陳稍捐官府秋毫利散作鄉村浩蕩春

題萬安野館

朱熹

身似孤雲去後還投裝猶說此牕間只因煙火蒼茫外卽是當時萬疊山

戲答楊廷秀問訊離騷之句二首

昔誦離騷夜扣舷江湖滿地水浮天只今擁鼻寒牕底爛却沙頭月一船

春到寒汀百草生馬蹄香動楚江聲不甘強借三峰面且爲靈均作杜蘅

環翠閣

楊萬里

一夜秋深惱井桐夢回得句寄西風詩成卻問題詩處正在東山東復東

釣雪舟

齋名

青鞋黃帽綠簑衣釣雪舟中雪政飛歸自巖州無一物扁舟載得釣臺歸

誠齋

浯溪見了紫巖回獨笑春風儘放懷謾向世人談昨夢便來喚我作誠齋

三三徑

并序

東園新開九徑江梅海棠桃李橘杏紅梅碧桃芙蓉九種花木各植一徑命曰三三徑云

三徑初開是蔣卿再開三徑是淵明誠齋奄有三三徑一

徑花開一徑行

寄題安福彭文昌春風樓

沂水何人解問津樓中蠹簡拂蛛塵杏花壇下朱絃瑟十指風生別是春

宿皂口驛

倦投破驛歇征驂喜見山光正蔚藍不耐東風無檢束亂吹花片點春衫

之官五羊過太和登快閣觀山谷石刻賦兩絕句呈

知縣李紳公垂主簿趙蕃昌父

閣中陳迹故依然欲問風流已百年南岸一峯東一堦自言曾識老詩仙

廬陵山水說西昌天遣金華印此邦詩本道他將取去如何遺下一澄江

出永豐縣西石橋上聞子規

花愁月恨只長啼雨夕風晨不住飛自出錦江歸未得至今猶勸別人歸

庚子正月五日曉過大皋渡

霧外江山看不真只憑鷄犬認前村渡船滿板霜如雪印我青鞋第一痕

往安福宿代度寺

春前臘後暖還寒陌上泥中溼更乾野寺鳴鐘招我宿遠峯留雪待誰看

萬安道中書事三首

玉峯雲劍透斜明花徑泥乾得
曉行細細一風寒裏暖時
時數點雨中晴

攜家滿路踏春華兒女欣欣不憶家
騎吏也忘行役苦一
人人插一枝花

桃花薄相點胭脂輸與梨花雪
作肌只有垂楊不胭脂
金鋪翠襯腰肢

赤谷道中

數曲能令客眼明三峯端爲此堂橫
僕夫不敢催儂去只
道長沙尙入程

題廬陵蕭彥毓秀才詩卷後

陸游

詩句雄豪易取名爾來閑澹獨蕭卿
蘇州死後風流絕幾
許工夫學得成

殷仲堪讀書臺

二首

向子賁

雲藏山色水連空樓閣參差一望中
重作書臺繼前迹幾
回池上想遺風

山邊溪潭碧澗開人言中有讀書臺
仲堪出處君休問且
對溪山酒一杯

之官過贛灘

徐鹿卿

玉局詩中惶恐灘聞之已爲骨毛寒
那知舞索并天柱更
向前頭作怒瀾

灘聲嘈雜怒轟雷頑石參差撥不開
行客盡言灘路險誰

教君向險中來

西昌倪氏有山谷書杜陵山水圖障歌作江山堂堂廢其後人以黃書求題跋感慨賦此

文天祥

杜二已亡黃九去長歌大字落江山百年風物今何似春水晚煙飛白鷗

有示余六一公故履者為題一絕

元吳澄

醉翁足跡不青原驚見如今雙履傳古物只須存集錄遺蹤一字可千年

文信公崖山贈歐陽伯雲詩

主亡國滅此何時贈別從容尚有詩心畫心聲俱軟美心

如鐵石只心知

此山堂植松

虞集

憑凌霜雪鼓風雷老幹猶傳高士栽想見樓頭黃鶴客千年一度此山來

癸卯元日晴繼復雪亦不廢出穀日復晴歸鄉塗宿

上元觀燈野廟隨所賦得十絕

劉詵

鐘鼓籠銅報曉晴燭殘曙色近簾明老來最憶兒時樂拜罷新年處處行

燭痕點點墜紅銀香影明牕綵曲藤春帖自題還坐久梅花餅水旋生冰

市門處處繫冰花燈影蛾雲動絳紗走馬城中三日雪不

知春已入誰家

朱門日日泊高車
陋巷冰枝積寸芽
春色不隨人意薄
夜來潛到小餅花

馮山人日馬蹄忙
懸勝輕寒翦翦黃
閒笑梅花無媚骨
至

今不洗壽陽妝
廬陵城中人日土女多游馮仰寺

杖履新年第一行
江山殘雪畫初成
春風歲歲藏何處
又與人間作曉晴

聯袂吟詩不計程
莫投郵店屢占晴
霜濃睡熟無人喚
誤

付城頭畫角聲
是日白城歸寓學翁兄同宿於塗

雪後蒿菘旋作青
郵家沽釀白於銀
山中未見新年歷
閒翦桃梢試立春

綠麥黃梳染繭絲
紙旗戲鼓祭叢祠
少年風物今仍在
別有傷心人未知

驛門北女賣娥兒
水屋紅燈出樹枝
鄰笛孤吹春未動
一簾微雨似秋時

北山口號

周霆震

斬黃蓮結蔡州城
風靡江東莫敢櫻
千里南來今送死
天知忠節在廬陵
過江雲起劍鋒馳
捕取紅巾血作池
後日廬陵收野史
水東第一賽男兒

城門晝開車馬喧
人行門道競靡尋
軍興那得庭如水
監都從來不愛錢

莫道逝川波自平莫道是驚元不驚白髮營門二千石幾
迴霜月送鞭聲

天獄東迴納贛川山峯斷處是青天螺湖橋下清流水留
向槎灘送戰船

林郭揚旗激箭鋒江城吹角氣如虹義山雲霧西昌月一
片丹心兩地同

江西省掾陳允中避罪來永新固守城池屹立羣盜
中泰和宣差以廉明著稱境內晏然

蜃氣樓臺轉眼空荒墟誰與弔秋蟲道邊小屋柴門掩猶
是當年種菜翁

紀事

去年閏三月十六日歐賊自袁來陷吾州十九日
以陳寇敗走郡城急報馳去里猶易桂芳暨脫罪
小吏顧清遠兩家兄弟獻馬納降力陳括貨之計
追至東門外懇留遣趙普元者復回遂稔安成之
禍四月二日城復趙誅
易顧殲焉亦天道也

萬斛北鹽肩海隅邇來商販競南趨去年今日城中價一
貫文纔十四銖

幸及西城早築場歲寒猶恐菜畦荒山材肉價何須問近
日鷄豚倍北羊常年北羊二貫一斤
今猪鷄四貫一斤

燼餘十室九摧殘折取充薪寸寸乾鄰境貴收紓乏絕遺
眈竊負活饑寒

鷄豚寥落傍柴荆稷稻初黃菜甲青臥聽兒童傳好語夜
來驛使到長亭

大洲江水綠如苔
畫角吹寒聽莫哀
白茅岡頭黃葉落
鷓鴣洞口鴻鴈來

過太平橋

秋山成火夜鳴梟
玉帳春醒富貴驕
獨抱韋編無寸策
白頭羞見太平橋

寇至

二十七日寇至三舍盡晚攜孫走下派止姪姻劉務本家二十八日寇出歷村岡頭家眷繼至下派二十九日早下派大驚擾走安塘

重疊青山道路長
疎疎紅葉樹經霜
日斜又度橫橋去
祇有江聲似故鄉

城西放歌

周寇萬四千人發永新水陸并下八月二十九日張錄事出軍九月一日府委官教授曠謁西昌參政所請師徵諸將赴援錄事無馬戰不利是夜急報三至黎明馳檄促援兵食時寇焚高沙斂陸錄事軍奔還城內外大駭或爭走入城或赴舟江洶或散投村落僵仆死傷不可紀賊騎掠太平橋官地上薄晚退屯援兵暮集三日早合戰自辰至午參政軍扼上流賊驚敗走衣裝器仗填野沿途義民邀擊擒獲頗多周寇奔還永新當是時郡城幾殆天也國家之福也歌竹枝以寫之
太平橋外吹血腥
追奔黃襖蹶門丁
黃襖全參政所招郡人門丁張錄事所起

在城門戶昨日縱橫官道上
豈知惡極有天刑
千金墮地不暇顧
妻孥咫尺愁相拋
此時爭門城內去
悔不雲山深結茅

理問軍中騎射精
從來賞罰最分明
疾驅赴援如風雨
曉發河山夕到城

水寨城關總寂然諸軍號令夜分傳火筒清曉三聲發諸將齊驅勇向前

歛陸池邊曉樹旗埋冤樹下夕僵屍皇天近日新開眼說與四方殘黨知

慘淡秋陰覆血痕參差蘇石倚蟠根古來此是埋冤樹今日還棲戰死魂

大洲男兒身姓熊把頭削鐵刃如風直前竟斬紅旗首步戰須還第一功

斬頭繫纍懸馬鞍眾中誰似林伯顏賊陣橫穿來復去三軍大捷唱歌還

先鋒破陣古來難好手齊推岳長官除却林奇誰與對交

馳兩馬萬人看

記得壬辰血亂流血流又到丙申秋兇徒惡黨還知否莫要輕來打吉州

莫道孤城鐵作關雲埋賊陣血朱殷強梁多在草村死戰馬纔餘八疋還

參政遣軍快閣下寇來相遇吉塘橋橫陳江上四十騎居民牆屋免焚燒

安坐轅門運六韜寇鋒壓境沸如濤收功一戰民安堵始信將軍定策高

太守當年憲使除軍須供給自紛如白髮蒼頭寧自暇一宵暫向府中居

錄事張公老且貧一身闔郡事如雲倉卒開城容萬眾從容行酒壯三軍

海全二參政

棄舟窮走計全軀全力戰憑城志掃除海身死不殊心死

異海全他日付誰書

都事吳不都刺

部伍相殘不敢呵林伯顏武美人雪洞夜酣歌舟中寓居

到頭誤國均遺臭只為高昌不可和全子仁高昌人其志專在吞吳恐其成功

紀實

戊戌夏五月之變新郡守張元祚與全府參謀蕭彝翁約同死蕭一再赴井死讀書臺下張竟降

振文堂上刃縱橫水陸旌旗瞬息更俯伏獻誠新太守笑

談赴井舊諸生

題超上人墨菊

明劉崧

露香秋色淺深中青蕊黃花自一叢最憶南園微雨過短

籬扶杖看西風

石鼓坑

松林日暮雨淒淒十里陂田五里泥一月離家歸未得桐

花落盡子規啼

快閣修篁古木圖二首

陳謨

老去張騫兩鬢華乘風曾記到天家回看粉壁千年樹還是銀潢八月槎

風流貳令寫蒼筤判簿題詩白雪香太守公餘時倚檻蒲

天風雨起瀟湘

題龍川圖

是文
所居地名

胡子祺

溪龍已度禹門高
萬里頽瀾漲雪濤
勝地不知今入畫
滿林煙霧起蕭條

冤嶺晴雲

羅倫

變化無端古又今
卷舒由我此機深
時來慰滿三農望
箇裏無心是有心

題劉近道秋江閒釣圖

戴邁

漠漠青山茆店孤
橋邊秋色滿菰蒲
可憐一棹衝寒去
還有鱸魚上釣無

過三峰

鄒守益

廿載天臺共振衣
而今衡嶽息塵騑
三峰過雨天清朗
遙望主人歸未歸

講學復古書院簡大尹顏鑰

真妄毫芒尚未融
往來寧免日憧憧
天將雨雪留佳客
夜半幽探未發中

迎祥觀

梁混

石徑雲深長綠苔
仙家樓臺絕纖埃
空庭盡日無人到
山鳥窺簷時下來

巴陵劉宗道自吉安與余同舟賦別 歐大任

雨中同上吉舟船
分手潯陽思惘然
明日思君是何處
萬行煙樹入湘川

自題半影二首

羅欽順

安卧煙霞歲屢移清羸渾似布衣時等閒開卷非無益只
悔平生學道遲

早以儒冠對紫宸三朝遭際忝臣鄰恩深未報身先老為
語見曹合致身

文山起義張履翁以家殉之族人祠焉少宰龍湖先

生作詩因次其韻

尹臺

丞相孤忠天漢垂白旗揚義憶當時傷心若論睢陽事合
有南雲配烈祠

龍窟

距香林東南三里曰鳳岡岡之下曰龍窟今土人呼為石窟文山先生生於龍窟長於富田予為產

子時聞故老說如此隆慶壬申曾一過龍窟以為先生降神地也瞻望久之萬歷庚寅秋再訪其地其遠孫出家譜視予則先生五代祖已徙富田矣事遠不可攷豈兩地互借為重乎夫先生奚啻為兩地重也感之賦二首

陳嘉謨

先生生為一代重先生死為百世師空餘兩地留喬木傳
信傳疑未可知

三百年收養士功一身四海自孤忠我來無地薦蘋藻剩
水殘山感慨中

文氏自言龍窟宅邊有秀水井甘冽異他泉因汲井
遺予予飲之果勝歸其家譜謝以是詩

鳳岡秋冷幾家煙龍井香分第一泉已有文章傳世業不
妨耕鑿續遺編

安成道中

楊載鳴

積雨蕭蕭征馬鳴朝雲忽吐數峰晴客懷對此堪披豁知
是看山第一程

安成石屋觀周日培新構草堂

馬猶龍

松堂人靜晚煙稠樹古雲籠小洞幽獨倚曲闌看翠滴不
知山色在高樓

為吳大舫翁寫竹石

管珏

杯湖舫翁所居也古名石溪李忠文劉忠愍諸先
正有石溪詩又召滄州唐伯虎諸名人有滄洲詩
今舫翁易其名曰杯湖同遊諸公又有杯湖詩湖
有石石異石有竹竹異日坐其中憑異石而看異
竹者舫翁適人又異余野人
不能詩為寫竹石以肖之

滄洲石溪一杯湖竹石奇奇世有無閒作墨花傳瘦影舫

舫異處可能圖

石蓮洞懷羅文恭

劉應秋

磴道岩堯入翠微洞門幽靄石為扉竭來大士開蓮葉留
與仙人振鶴衣

黃竹臺

劉陽

紫雲潭逼谷生寒黃竹臺高客掩關分付洞前流水去休
傳竹葉到人間

觀音燈

秋澹孤峰逼大清松堂芸館客星明山光半夜衝牛斗莫
是牀頭拄杖生

遊箕峰

周性善

策杖尋幽到遠峰
杖頭撥盡紫雲封
生來帶得烟霞骨
不用丹砂駐玉容

過三峰 一首

張崧

神靈融結小崑崙
壁立南來冠冕尊
仰止平生今白首
誅茆欲往尙無能
百年塵土誰脫屣
靜掩柴扉學固窮
松下幾回鳴鶴月
三台遙拜紫霞峰

次錢山

朱世守

錢山寧用買山錢
勝絕桃源別有天
西社東鄰烟樹裏
滿浮綠蟻恣譚元

幼女七歲聞不還
悲啼欲死書此慰之

黃鵠飄然辭帝畿
無煩草木淚沾衣
遺巢不覆君恩重
北海仍留稚女歸

劉鐸

過快閣

國朝

趙進美

五年幾度此中行
快閣依然對晚晴
鄭重郡人惜別意
扁舟如葉暮江清

吉水絕句

王士禎

螺川川北字江西
沙暖舟喧咫尺迷
纔過元宵如上已
春山處處郭公啼

望青原山有懷藥地愚山二公

白鷺空洲又劫灰

原注愚山重建白鷺書院今燬於火

青原山色自崔嵬
風

流二人今何在獨問廬陵米價來

冒雪出灘遇官軍船於萬安城下 陸世楷

灘盡黃公聲悄然孤城一片擁寒煙軍中自愛吹羌笛散
落梅花滿客船

晚登快閣 施閨章

閣上人如峯頂行登臨不盡古今情誰憐難了公家事把
酒重添白髮生

安成至廬陵道中作

山田斜趁嶺雲低引得清泉灌綠畦春暖插秧乘穀雨不
勞布穀一聲啼

廬陵得余季廬先生書

螺子山前春草生蒲陽書到淚雙傾愁心歷亂君知否聽
徹江聲到五更

青原講會示諸同志

遠別還偷三日閒絃歌同見古人顏木犀早已傳消息一
樹花開香滿山

弔譚烈婦 高旭

亂離無處避戈鋌猶擁孤兒在膝前貞骨已埋譚氏土烈
痕猶著孔庭磚

寓禾山最深處 賀是

石脉寒泉春透露蘿陰殘雪月勾留苔錢滿地無人用付
與閒花野草收

元巖

劉元珍

深山來往無朝暮石磴參差飛紫霧采藥不知僊子處年
年巖上松花吐

梅田洞

李綬

出地亭亭便十圍籠烟拖霧不勝垂金城節使休相訝未
要春風借力吹

即教露壓枝猶勁縱遣風搖葉亦齊寂寞誰知千載意只

今輕薄號高飛移楊一名高飛石柳

泥蟠局踣冷雲隈吟向秋風夏玉哀天帝謫來為守藏不

容容易起風雷石龍

吳郡叩聲煩擊考周京留篆費摩挲渾金璞玉惟君爾虛

響浮文奈汝何石鼓

楸玉枰虛罷合圍年來冷暖更誰知長安國手爭先著看

到空山下子遲

殘局何年擲此間不勞奪角與衝關真人勝負原無用白

鶴松陰盡日閒石基枰

耘芝飼鶴種靈苗碧玉花時未寂寥自是世人輕棄擲教

將無用作逍遙石田

列炬幽宮渡冷泉碧光紅影兩娟妍心知不是仇池穴猶

想潛通小有天石池

知費神工幾運斤不緣局脚感斯文蓮花七寶尋常事且

向深山臥白雲石床

珠眉螺髻老荒煙繞座蘆芽膝遍穿只道此公難解脫不知面壁要多年 石羅漢

忠義潭 陳智言

八姓勤王事不成袍溪灩灩葬簪纓至今流出潭中水還與文江一樣清

東山雜唱 陳善言

空月疎林四面遮橫通山徑杳無涯春風要我長亭坐閒看兒童摘野花

東山高臥待秋風世事都歸一笑中搔首問天天不語白雲飛去伴飛鴻

弔忠義潭 劉萬載

嘆息匡山大事休窮鄉亦自憤同仇嘉禾城下如湯水不作人間混濁流

浮玉洲 劉景清

銀沙碧草淨秋波四面樓臺上下坡清磬一聲羣籟寂蘆花深處月明多

倚天湖 賀毓傑

不須貫月遡源流直在禾山最上頭百丈玉虹看未了桐鯨吼落海門秋

搗石 劉見龍

怪石無端秋自鳴西風吹作搗衣聲天涯多少繁霜鬢此夜同牽萬古情

玉虛觀

劉愈

竹映牕前水激門數聲幽鳥報朝昏行來恐踏苔痕破
目送山雲過遠村

李烈婦墓

曠瑞年

烈婦湖南酃縣庠生譚振漢妻順治己丑遭寇亂
避居永新之鷄冠塘被執不辱溺水死遂葬其地
鬱鬱埋香已百年芳魂猶自守遺鈿月明愁倚西風立
蔓草荒郊泣杜鵑

過鷓鴣峽

潘鯤

鷓鴣峽口鷓鴣歌官事嚴程奈若何三十六峯晴雨外
一時回首白雲多

忠義潭

李錫

寒雨淒霏草木悲清波兩岸獨淪漪勤王有志天難挽
弔盡空潭水未知

青原卽事用施愚山先生韻

龍亨繡

數峯藏寺入雲孤曹洞開宗握智珠風磬杳然深樹裏
誰尋妙旨到虛無

蕭然水石意何窮谷口潺潺碧澗風聽到夜深禪榻
靜無絃琴在月明中

石上孤松石下泉雙橋風月自無邊五公去後誰吟
弄蔓草荒祠二百年

何年老幹起枯荆更有新枝劫後生憶向孤根閒入
定蒲團倒影寂無聲

噴雪泉邊煮活水魚眼蟹眼驗來時
曾厨蒸得廬陵米惆悵斜陽嶺上枝

謁西陽宮三首

李金臺

六一文章擅一時孝思尤重瀧岡碑
誰知貝闕珠宮裏也愛人間絕妙詞

幾見豐碑出外臺妄言妄聽總疑猜
不知當日歐陽老曾倩黃公草檄來

斷碣消沈不計年空山久自鎖寒煙
摩挲碎瓊出幽草好事冥搜賴後賢

題八十四灘

周燠

迴峰東浪看天矯聳石縈波識蜿蜒
八十四灘何曲曲化

工穿作古龍泉

高飭一瀉水東流撥觴移山不繫舟
何似險灘纔十八幾人惶恐下虔州

灣叢細草金鷄瀾浪翦晴沙雪鷺鷺
畫出亂山千萬疊片帆一徑徙天池

盤紆村落繞迴谿取道溇雲向白泥
灘中村名回首故園天半壁夕陽遙挂數峰西

銀山懷古二絕

周培

羣英集社古東山鶴夢風流去不還
明季梁明經愈榮結社東山夢白鶴飛集

占以次日誰來比亭午剩有朝龍亭外塔待歸華表耀塵寰

迤邐山行逸興多
新亭鎖翠挂煙蘿
瀕江得藉金堤築
長塿為雲機
好為千秋挽逝波
先生所築

葛仙巖

杜一鴻

洞裏真仙去不回
百年賓從踏春來
空山盡日無人到
屋角桃花白在開

忠烈吳希奭墓

次韻

孔興源

昔師人去古臺空
埋沒塵函泣劍雄
雪窖同歸華表冷
鵲魂到處怨啼紅

泣馬坵

建績空留汗血斑
長驅會此奪秦關
一從垓下悲鳴後
燕市難求駿骨還

凌雲塔

李其昌

誰是凌雲山斗齊
浮圖遙望說攀躋
丹梯萬仞無虛躡
欲上須知著脚底

水雲巖

水雲深處萬山封
誰解巖懸罨畫容
一自搜奇來謝屐
銀河長瀉碧霄峯

賦

棲深賦

為王舉山作
地名舉子岡

元劉訖

六合之內八荒之墟
匪皋匪涖不甸不厘
有岡伏興望之
芊綿蓋得名於吾黨
而託之乎槐黃之一
言於是過者喟然
而語曰此非姓溪以
冉而名谷以隱者之
盤旋邪非科

目之已遠而寄想像於千賦者邪爰有有道築居其巔問其所從來則蓋元祐之初元矣青山繚屋古木橫天籬援翳塗藤茨入椽內環洗墨之池外繞種桃之田竹分徑造之所蔬滿日涉之園春林雨過花澗流泉孤鶯自啼時鳥雜喧清風墮籜永日聞蟬焚香起坐茶味入禪微涼蕭瑟林木自絃臨清賦詩脫葉如船天寒酒熟梅花入檐峯雪成畫牆暎獻暄閱大化之迭序甘窮居以爲緣族四世而廡狹乃構寬於厥先折干雲以爲棟逝棲鳥而爲樓鳴機隱於內霑藏籍蠹於西偏文公題記韻士贊篇風月不待獻而彌勝江山不假飾而增妍念百年之種樹終自庇於本根又歌聚之從起待千載之雲聞豈飄風之晝語異茅

雨之夜眠比隱橘而非幻擬種桃而非仙於是先生欣然而笑曰深矣吾之棲也可以驕元亮而傲玉川矣客有難之曰吾聞淺深表裏所分山之深也在谷水之深也爲淵今先生之居介毫末於一馬寄圭粟於大千南非其中北匪其邊而先生何所指以爲深焉左眺高圍右接廣阡謁車望其林翳饑袂想其炊煙而先生何所持以爲深焉窮搜邃討談空說元問字填巷受經欵門使昧者欲赴於其燧辨者欲磨於其堅而先生何所匿以爲深焉先生曰夫泥於迹者常有所窮游於化者或有所全吾聞至人入水不濡入火不然會光塵於一隙混涇渭於同源故卜於肆者庸知其非隱行於市者安知其非仙嵇康好琴靈運遊

山伯倫酒狂張旭草顛豈所託之或淺嘗不離乎人間顧
吾深之安在誠可指於目前彼山林之委塊亦身外之附
懸於是客莫能詰走若季咸望其樓而不見渺山水之蒼
然

詠歸亭賦

繁青原之崔嵬維文學之奧區前忠節之馳驟後賢哲之
步趨振文德於昭代深化雨於涵濡紛洋洋而濟濟咸砥
礪於廉隅屹宮牆之數仞接道義之通衢嗟遊息其何所
得遺地於榛蕪宛城南之沂泗用建亭而象諸江山窮其
一覽蓋亦庶乎詠歸於風雩也嗚呼千載而上聖門此樂
千載而下我亭此作剖洙泗之藩籬溯淵源於濂洛雖興

廢其何常初無習於今昨蓋將示天下之廣居振士林之
教鐸而豈佻達之娛觀美之託也哉且其風和景曛萬物
欣覩勃鬱蕭森生機畢露則青春之將暮也亦有良朋與
子偕行單袷初試微涼乍生則我服之既成也章甫峩峩
衣裳楚楚來游來歌笑笑語何啻冠者五六童子六七
其侶也鷺渚泱泱可濯可湘淵乎沂水之淨也螺峰蒼蒼
可息可藏鬱乎雩林之盛也於以濯我纓於以陶我性吟
風弄月之襟懷隨柳傍花之意興登斯亭以元覽尙彷彿
於見聖悟狂黠之雍容本胸次之昭瑩豈世異而事殊固
合轍而同徑彼醉夢之紛拏何莫踐於斯境於是撫事興
懷因名致慨亭夕陽而愈悲亭山陰而安在連昌之宮檻

半欹北苑之沈香速壞華亭之唳鶴不聞湖亭之蔭魚何怪是皆逞富貴於一時擅風流於當代縱情肆欲歡雖盛以奚為極侈窮奢志雖得而愈殆曾不若此亭翼然聖途伊邇建梁棟於仁義立磐石於忠信禮樂其檐暈詩書其封畛可以樂日用之經常掃人欲於淨盡見天理之流行等氣象於堯舜倘聖賢之可歸庶努力於日進辭曰詠歸之樂著於經兮世遠人亡示以亭兮我造斯亭詠而歸兮希聖希賢殆其庶幾兮

赤石潭賦 有序

明周叙

正統九年甲子之秋七月既望余以使命便道還京宗親故友餞送於赤石潭宦遊萍梗出處難謀慨然有懷遂作斯賦

沿文江之橫浦至赤石之澄潭水萬頃以凝碧山四合而染藍信乎其乾坤所融峙而仁智所樂躋也觀其崖垠磊砢岸谷谿衍爛如原火燧若朝霞入元淵而莫極匯滄波其無涯當夫春江方漲駭浪驚濤洶湧激撞銀山鐵壁不足以侔其壯洎其秋潦已涸天容月色空曠虛明練舒鏡展不足以擬其清則斯潭之所以得名為可徵矣若乃眺乎其北則三凹屏列諸峯陳屯大宛旋凱而龍馬交駮昆陽敗北而虎兕羣奔望乎其西則近接鷹湖遙連錦峰白沙翠竹之掩映煙村雲樹之鬱蔥慨鄉袞勝遊之舊躅念先親遺直之英風至於東則澧溪金港之交流釣臺鰲山之錯峙能不感夫金宋構兵炎鼎遷播而鳳艦龍舟亦嘗

至於此乎南則虹橋綠野佛刹仙臺藹林泉之幽翳葺劍石之崔嵬騷人墨客固多留憩真仙杳冥豈復有浮空而往來者乎蓋其爲地也豁故能合數百里之大觀其爲景也奇得不起千萬年之遐想此古今過從者之同賞也而余猶獨有所悵惘昔余之少而處也從宗族父兄省邱隴於茲潭之山陰奠春露之藻蘋撫秋風之宰樹殆德澤綿而嗣守固也顧瞻潭濱之他隴樵兒牧豎躑躅於孟嘗之墓豈非富貴而改其素者乎逮余之長而仕也幾舟楫往返於斯潭之水滸把籬觴之汲汲趨王事之皇皇中抱丹而鬢毛蒼矣反羨其旁居人釣叟熙皞於無懷之鄉又何身世之忘豈非貧賤而任其常者乎烏兔跳丸彭殤一軌

歎榮瘁之浮漚悲老壯之逝水擊流光而歌之曰潭之波兮悠悠去故鄉兮那可留潭之石兮峩峩惟令名兮不可磨俯水際兮馮夷仰天畔兮嫦娥倡莫余和兮奈爾何

自新齋賦爲郡司理作

周莊

家北平之長春兮什弭節乎廬陵高齋建而宏敞兮揭自新以扁名曰惟茲之靈鑑兮無或掩於昏塵必磨礪之日日兮又無日而不新物有萬之不同兮若蠶絲與牛毛至妍媸與好醜兮形靡一之遁逃闢方塘之半畝兮來活水於源頭會天光與雲影兮我無我而造物者游瞻長江之一碧兮灑潦盡而風波不起映中天之明月兮皎澄空而見底居旦晝以游息兮夜寢寐之與同是爲我公之齋兮

是為我公自新之功郡之職為親民兮情莫難於折獄是
 非紛糅而庭進兮一一倚公之明鞫不得其情固三反而
 五覆兮得其情哀矜而不喜審公是於同案兮豈其臆決
 而自止青天白日於眾之庭兮篝燈帷坐而夕惕求其生
 而外昭悉於萬端儻一事一日之有間兮即為染厥故而
 所寶之弗完繫公之明以自修兮歲月日而時無易今之
 德不孤有鄰兮古之人是訓是式將為開封之神明兮抑
 彷彿古園扉之露宿將陰德以高厥門兮抑嗣無冤之往躅
 遐思唐虞之世兮一皋陶垂萬古以無窮象刑設而靡用
 兮曰弼五教而民協於中古與今原無兩兮是維公之緝

熙由郡臬而廷尉兮普日月所照而雨露之詄曰天嶽之
 峯兮嵯峨有淮者淵兮江之螺齋之銘兮若何淵不可涇
 兮山不可磨

天華山賦

國朝 伍柳

維吉州南浦堂奧西昌門戶控三江之上流居五嶺之當
 路北轅崢嶸於虎頭天下襟帶夫龍沙山周亘乎千里鍾
 神秀於天華自密雲之四靈謝攢天之萬壑峰至是而蜿
 蜒岡盡卸夫磅礴亢吳楚兮列要津橫章貢兮近負郭高
 固讓夫九嶷祀弗共乎五嶽雖無金明之草亦鮮坎離之
 藥不見商山之芝焉產于闔之玉少珍禽與奇獸闕怪石
 與古木此皆未之前聞似亦孰乎寂寞然而綠常臨水翠

半遮坂羊腸夸太行之險金篋耻岱宗之禪不貪高以攀
南斗肯凌雲而嶺北嘯遠矣難考秦碑遐哉自標禹甸廼
有藥珠之宮仙喜樓居竟如仙令之鳧客歸園苑王郭曾
駕鶴以嬉遊白呂亦乘雲而寄嘯指縹緲以爲家躡虛靈
而立要若乃迎薰門外寶成樓邊白屋出林綠野含煙簷
牙交啄於闌闔酒旗旖旎乎井屋踞層巒而俯矚倚長松
而盤桓爾其翠螺朝爽青原夕照思御暑以乘寒悟羣真
之眾妙霞綉錦而朝日升林抹嵐而暮山紫雖天末之氣
候不常葢山間之朝暮若此爾其青雀杳冥黃龍往來帆
東指夫巴邱撓欲上乎虔臺樓名利之蠅營席捲風而不
收或患失而患得我何思而何求登茲山以懷古弔二忠

之先生望廬陵之故里指雲際之遙岑後百世而尙友感
鬱鬱之霞蒸憶庾信兮枯樹遇阿房兮武陵疑茲山之騰
笑遂勒移於山庭恭洗硯而作賦愧十二之龍賓

武功山賦

劉 泉

劉子家於闔閩之間將滌塵慮豁靈關披霞日拂雲鬢寤
寐西垂之艮岳神交配金之名山乃役僕從載椒盤張元
幟駕征駟珮璫朝朝劍玉琅琅惟茲辰兮尊收司令氣蕭
瑟兮珠露凝霜絕離塵兮馳突澇泱當淒切兮週迴旁唐
盤互嵯峩兮青屏婉轉騰激冽兮翠帶長駢竹笨簪兮歷
寶澄景清練兮駐戒岡落楓木兮爽靈籟唱銅錕兮激清
商晝復暮兮悲陽烏之忽沒延佇立兮復有天鷄鳴扶桑

風胎雨聲不可以暫休兮惟我馬之元黃承阿連蝻綺錯
而霞分兮云是武功之昂藏臥雲來兮蹲合十步而休兮
坐羊腸合阨危兮行不于意屢鼻兮遙相望五十盤兮皆
歷遍岫排列兮儼趨踰雲觸石兮膚寸合月下矚兮變蒼
蒼瓴甌瀉兮流玻璃別有飛瀑兮駕銀浪恍如洞庭春水
生兮一碧萬頃共天光又如冬雪之皚皚兮照輝映蔚乎
長江琪花瑶草不知其名兮時有幽光奏笙簧沈沈隱隱
磷磷瀾瀾纂纂喔喔篔簹煌煌者不可言狀兮疑是飛錫
出上方舒卷筇兮彌節倚月套兮徬徨仙人出兮何助勦
當輶前兮捧爐香劉子於是乃息乃止乃歌乃謠尋巖穴
之間升高峻之堂餐飽蔬飯吟滿詩囊三宿而興猶未已

也乃寒羽衣佩茱萸凌縹緲乘虛無尋公超之霧市誦道
家之陰符俄而登於絕頂之上璇宮開朗萬象呈秋銀河
落兮度牛女玉京見兮十二樓俯八荒兮會吳荆而小衡
山下視諸峯兮如香爐筆架之得名者皆拱立而頽羞惟
寒泉之砰礚撫草木而優游自以爲適矣客有過而言者
曰子何爲所見者之小也吾聞山不在高有仙則神茲一
隅之地非食毛之士是以紫芝淒涼兮白石齒齒綠野寂
寞兮皓月無主聊寄傲兮笑南窗賦招隱兮空懷古神雖
假於休貺名不著於寰宇此禹貢職方之所不收而山經
地圖之所不數也予曰嘻嘻夫在人者貴立其本而矯飾
不足誇在物者貴其有實而浮名不足稱粵自兩儀奠位

有陽有陰翕聚凝然為地者靈融液流行發而為人惟人之實貴踐其名尼山孕祥宣父挺生惟岳降神生甫及申惟此郡之生人實文獻之足徵自前代而傑出兮彬彬濟濟當我祖之開運兮協贊化鈞璋瑋連兮廊廟之珍雨露脂膏兮潤澤生民道籠德絡兮動作法程飲經餐史兮言語為文茲固扶輿之清淑而謂非此山之靈不可也彼峩嶷之下三蘇出焉廬山之高中允得名其大者如斯而已矣其他登覽之間翰墨之場皆所以舒騁日如醉夸心也何足道哉吾之來也方將洗我塵垢薦我精禋慨馳驅於終日造前途而問津人皆迷於醉夢忽驚起而思醒不踴躍以尚往猶蹈常而逡巡惟寸陰之不惜致老大之難

成來虔告以請命冀超悟於仙神客尚何為小之也客笑而去予乃為之歌曰有山崢嶸兮崛起於西方兮彼美人兮山之精靈兮山兮人兮各無負所生兮

大樟賦

施閏章


吉州官舍旁有廢署亭館既虛古樟獨存榮枯相半不知歲年顧影婆娑情感斯集為之賦曰

維豫章之都會兮依茂樹以立名生七日而表異兮更累禩以長生何喬柯之拂層霄兮寄婆娑於空庭洵魁壘而耆碩兮頎然如故國之老成旭日澹兮暍時靈飈發兮清冷驚絕巘之秀琦兮紛蒙籠兮崢嶸影扶搖兮千仞腹輪囷兮十抱體臃腫以辭繩墨兮節礪砢兮骨傲卜歲年其莫知兮若根株之天造塊獨處兮旁無人風夜號兮雨嘯

豈不可崇棟而丹檻兮聊樛散以相羊爛五色兮繡錯凝
清液兮芬香涉蕭緘而不槁兮棲綠葉兮元霜苟孤榮之
不隕雖憔悴兮何傷歛青陽兮載旋敷繁英兮峭蒨枝油
油以雲垂葉冉冉兮霧散弛巾帶以命觴陰炎敲而却扇
豈日月之改度愕寒暑之頃變既連蜷兮善下復天矯兮
若游廻眾羽以來巢兮羣長子孫而鳴啾啾即梟鸞其雜
處兮直道大而能周木寄生兮成拱芝叢秀兮菌聚寧頽
形而瘁貌兮招萬類以疢附悵亭館之就墟兮巋階基其
如故彼息影而坐憇者閔焉如四時之代去悟盛衰之相
推兮蘊憊怛而誰訴生偃蹇兮正直集百靈兮憑依駕飛
龍而降雲中兮森蘭旌兮桂旗聆笙鶴之逸響想羽人之

詩徵

委蛇樂叫蟠以觀化兮秉素節而不移鄙封爵兮素松遠
宮闕兮漢柞齊大椿兮春秋悲楊柳兮搖落即苑枯其代
嬗兮若逍遙於廣莫滄海竭而山摧兮愍鄧林之殫殘良
託身兮得所歷斧斤而獨完時開襟而矯首兮閒倚嘯而
盤桓終含貞兮抱樸審大道之所安





吉安府志卷五十二終

吉安府志

卷五十二

藝文志

五十九



詩徵

五
三
六

